

御製律呂正義




卷五
之五

御製律呂正義後編卷之一百三

樂章考十一 宗廟

隋

唐



隋宗廟樂章

高祖遣盧思道等。列清廟歌辭十二曲。達于太樂教習。以代周歌。其初迎神七言。象元基曲。奠獻登歌六言。象傾盃曲。送神禮畢五言。象天行曲。但改其聲。而辭不易。仁壽朝。謂文多浮麗。不足以述宣功德。詔虞世基等創製。後大業中。雖欲改作。並依舊章。惟新造高祖廟歌九首。今亡佚不傳。

隋太廟歌辭

案隋書樂志曰。文帝開皇中。太廟迎神歌辭。登歌辭。俎入歌辭。皇高祖太原府君。皇曾祖康王。皇祖獻王。

皇考太祖武元皇帝。四室歌辭。飲福酒歌辭。送神歌辭。其俎入飲福酒。與郊丘社廟同。凡九章。

迎神

務本興教。尊神體國。霜露感心。享祀陳則。官聯式序。奔走。在庭。几筵結慕。裸獻惟誠。嘉樂載合。神其降止。永言保之。錫以繁祉。

登歌

孝熙嚴祖。師象敬宗。惟皇肅事。有來雝雝。雕梁霞複。繡棟雲重。觀德自感。奉璋伊恭。葵竚盡飾。羽綴有容。升歌發藻。景福來從。

俎入

祭本用初。祀由功舉。駿奔咸會。供神有序。明酌盈樽。豐犧實俎。幽金既薦。績錯維旅。享由明德。香非稷黍。載流嘉慶。克固鴻緒。

太原府君神室

締基發祥。肇源與慶。迺仁迺哲。克明克令。庸宣國圖。善流人詠。開我皇業。七百同盛。

康王神室

皇條俊茂。帝系靈長。豐功疊軌。厚利重光。福由善積。代以德彰。嚴恭盡禮。永錫無疆。

獻王神室

盛才必達。丕基增舊。涉渭同符。遷邠等構。洪風邁德。義高道富。神鑒孔昭。王猷克懋。

武元皇帝神室

深仁冥著。至道潛孚。皇矣太祖。耀名天衢。剪商隆祚。奄宅隋區。有命既集。誕開靈符。

飲福酒

神道正直。祀事有融。肅雝備禮。莊敬在躬。羞燔已具。奠酌將終。降祥惟永。受福無窮。

送神

享禮具。利事成。佇旒冕。肅簪纓。金奏終。玉俎徹。盡孝敬。窮嚴絜。人祇分。哀樂半。降景福。憑幽贊。

唐宗廟樂歌

大唐樂者。開元朝釐定樂章總名也。史載貞觀六年。詔褚亮虞世南魏徵等。分製樂章。開元初。則張說奉制所作。竊攷太常奏請。元宗下制。又曰弘農府君。至大武皇帝六廟。貞觀中已詔顏師古等。定樂章舞號。識名撰辭。稍有差別。大歷元和間。各廟添備雅音。式垂令典。其餘武韋祭其私親。概不採入。以崇禋祀云耳。

唐太廟樂章

案唐書樂志曰。太宗貞觀中。享太廟。迎神用永和之樂。登歌酌鬯用肅和之樂。迎俎用雍和之樂。皇祖宣簡公酌獻用長發之舞。皇祖懿王酌獻辭同。太祖景皇帝酌獻用大基之舞。世祖元皇帝酌獻用大成之舞。高祖大武皇帝酌獻用大明之舞。皇帝飲福用壽和之樂。送文舞出迎武舞入用舒和之樂。徹俎用雍和之樂。送神用永和之樂。凡十一章。其皇帝行用太和。武舞用凱安二樂。辭同。冬至園丘。並魏徵褚亮等撰。

迎神用永和

黃鐘宮三成。大呂角二成。太簇二成。應鐘羽二成。總九變同用。

於穆烈祖。洪此丕基。永言配命。子孫保之。百神既洽。萬國在茲。是用孝享。神其格思。

登歌酌鬯用肅和

夾鐘均之黃鐘羽

大哉至德。允茲明聖。格于上下。聿遵誠敬。喜樂斯登。鳴球以詠。神其降止。式隆景命。

迎俎用雍和

崇茲享祀。誠敬兼至。樂以感靈。禮以昭事。粢盛咸潔。牲
牲孔備。永言孝思。庶幾不匱。

皇祖宣簡公酌獻用長發

無射宮案唐會要曰。貞觀十四年。詔用顏師古
許敬宗議。皇祖宣簡公懿王。並奏長發之舞。取
詩云。濬哲惟商。長發其祥也。

濬哲維唐。長發其祥。帝命斯祐。王業克昌。配天載德。就
日重光。本枝百世。申錫無疆。

太祖景皇帝酌獻用大基

太簇宮

猗歟祖業。皇矣帝先。剪商德厚。封唐慶延。在姬猶稷。方
晉踰宣。基我鼎運。於斯萬年。

世祖元皇帝酌獻用大成

姑洗宮

周穆王季。晉美帝文。明明盛德。穆穆齊芬。藏用四履。屈
道三分。鏗鏘鐘石。載紀鴻勳。

高祖大武皇帝酌獻用大明

蕤賓宮案唐會要曰。貞觀十四年。詔用顏師古
等議。高祖廟奏大明之舞。取易曰。大明終始。六
位時乘。詩大明之篇。稱文王有明德也。

五紀更運。三正遞升。勲華既沒。禹湯勃興。神武命代。靈
睠是膺。望雲彰德。察緯告徵。上紐天維。下安地軸。徵師
涿野。萬國咸服。偃伯靈臺。九官允穆。殊域委贄。懷生介
福。大禮既飾。大樂已和。黑章擾圉。赤字浮河。功宣載籍。
德被詠歌。克昌厥後。百祿是荷。

皇帝飲福用壽和

八音斯奏。三獻畢陳。寶祚惟永。暉光日新。

文舞出武舞入用舒和

聖敬通神光七廟。靈心薦祚和萬方。嚴禋克配鴻基遠。
明德惟馨鳳歷昌。

徹俎用雍和

於穆清廟。聿修嚴祀。四縣載陳。三獻斯止。籩豆徹薦。人
祇介祉。神惟格思。錫祚不已。

送神用永和

肅肅清祀。烝烝孝思。薦享昭備。虔恭在茲。雍歌徹俎。祝
嘏陳辭。用光武志。永固鴻基。

永徽以後太廟樂章

案唐書樂志曰。永徽以後。續撰太廟樂章。太宗文
皇帝酌獻用崇德之舞。高宗天皇大帝酌獻用鈞
天之舞。中宗孝和皇帝酌獻用太和之舞。睿宗大

聖真皇帝酌獻用景雲之舞。皇祖宣皇帝酌獻用
光大之舞。凡五章。

太宗文皇帝酌獻用崇德 永徽元年造

夷則宮

五運收卜。千齡啟聖。彤雲曉聚。黃星夜映。葉闡珠囊。基
開玉鏡。下臨萬寓。上齊七政。霧開三象。塵清九服。海潤
星暉。遠安邇肅。天地交泰。華夷輯睦。翔泳歸仁。中外禔
福。績踰黜夏。勲高剪商。武陳七德。刑設三章。祥禽巢閣。
仁獸遊梁。卜年惟永。景福無疆。

高宗天皇大帝酌獻用鈞天 光宅元年造

黃鐘宮

承天撫籙。纂聖登皇。遐清萬寓。仰協三光。功成日用。道
濟時康。璇圖載永。寶歷斯昌。日月揚輝。烟雲爛色。河嶽
修貢。神祇效職。舜風攸偃。堯曦先就。睿感通寰。孝思浹
宙。奉揚先德。虔遵曩狩。展義天扃。飛英雲岫。化逸玉表。
神凝帝先。乘雲厭俗。馭日登元。

中宗孝和皇帝酌獻用太和 景雲元年造

太簇宮

廣樂既備。嘉薦既新。述先惟德。孝享惟親。七獻具舉。五
齊畢陳。錫茲祚福。於萬斯春。

睿宗大聖真皇帝酌獻用景雲 開元四年造

黃鐘宮

惟睿作聖。惟聖登皇。精感耀魄。時膺會昌。舜慙大孝。堯推讓王。能事斯極。振古誰方。文明履運。車書同軌。巍巍赫赫。盡善盡美。衢室凝旒。大庭端辰。釋負之寄。事光復子。脫屣高天。登遐上元。龍湖超忽。象野芊綿。遊衣復道。薦果初年。新廟奕奕。明德配天。

皇祖宣皇帝酌獻用光大 開元十年造

無射宮

大業龍祉。徽音駿尊。潛居皇德。赫嗣天昆。展儀宗祖。重

誠孝孫。春秋無極。享奏存存。

舊享太廟樂章

案唐書樂志曰。太樂舊有此詞。不詳所起。迎神。金奏。送神。凡三章。

迎神

黃鐘宮大呂角太簇徵應鐘羽並同此辭

七廟觀德。百靈攸仰。俗荷財成。物資含養。道光執契。化籠提象。肅肅雍雍。神其來享。

金奏 次迎神

無射宮

肅肅清廟。巍巍盛唐。配天立極。累聖重光。樂和管磬。禮備烝嘗。永惟來格。福降無疆。

送神

五聲備奏。三獻終祠。車移鳳輦。旆轉紅旗。禮周籩豆。誠效虔祇。皇靈徙蹕。簪紳拜辭。

神龍太廟樂章

案唐書樂志曰。中宗神龍元年。享太廟。迎神用嚴和之樂。皇帝行用昇和之樂。登歌裸鬯用虔和之樂。文舞出武舞入用同和之樂。武舞用寧和之樂。徹俎用恭和之樂。送神用通和之樂。登歌奠鬯用

昭和之樂。皇后酌獻飲福用誠敬之樂。徹俎用肅和之樂。送神用昭感之樂。凡十一章。其皇后助享皇后行用正和。同貞觀中宮朝會辭。迎神用嚴和

黃鐘宮三成。大呂角三成。太簇徵三成。應鐘羽

肅肅清廟。赫赫元猷。功高萬古。化奄十洲。中興丕業。上荷天休。祇奉先構。禮被懷柔。

皇帝行用昇和

黃鐘宮

顧惟菲薄。纂歷應期。中外同軌。夷狄來思。樂用崇德。禮以陳詞。夕惕若厲。欽奉宏基。

登歌裸鬯用虔和

大呂均之無射羽

禮標薦鬯。肅事祠庭。敬申如在。敢托非馨。

文舞出武舞入用同和三

太簇商

惟聖配天。敷盛禮。惟天為大。闡洪名。恭禋展敬。光先德。蘋藻申虔。表至誠。

武舞用寧和

林鐘徵

炎馭失天綱。

一作王綱

土德承天命。英猷被寰宇。懿躅隆邦

政。七德已綏邊。九夷咸底定。景化覃遐邇。深仁洽翔泳。

徹俎用恭和

大呂均之無射羽

禮周三獻。樂闋九成。肅承靈福。悚惕兼盈。

送神用通和

黃鐘宮

祠容既畢。仙座爰興。亭亭鳳舉。藹藹雲昇。長隆寶運。永錫休徵。福覃遺厥。恩被黎蒸。

登歌奠鬯用昭和

大呂均之無射羽

道洽二儀交泰。時休四寓和平。環珮肅于庭實。鐘石揚乎頌聲。

皇后酌獻飲福用誠敬

黃鐘宮

顧惟菲質。忝位椒宮。虔奉蘋藻。肅事神宗。敢申誠潔。庶罄深衷。睟容有裕。靈享無窮。

徹俎用肅和

大呂均之無射羽

月禮已周。雲和將變。爰獻其醑。載遷其奠。明德逾隆。非馨是薦。澤霑動植。仁覃寓縣。

送神用昭感

黃鐘羽

鏗鏘韶濩。肅穆神容。洪規赫赫。祠典雍雍。已周三獻。將乘六龍。虔誠有托。懇志無從。

開元太廟樂章

案唐書樂志曰。元宗開元七年。享太廟樂章。迎神用永和之樂。皇帝行用太和之樂。登歌酌瓚用肅和之樂。迎俎用雍和之樂。皇帝酌醴齊用文舞闕

名。獻祖宣皇帝室。奠獻用光大之舞。懿祖光皇帝室。奠獻用長發之舞。太祖景皇帝室。奠獻用大政之舞。代祖元皇帝室。奠獻用大成之舞。高祖神堯皇帝室。奠獻用大明之舞。太宗文武聖皇帝室。奠獻用崇德之舞。高祖天皇大帝室。奠獻用鈞天之舞。中宗孝和皇帝室。奠獻用太和之舞。睿宗大聖皇帝室。奠獻用景雲之舞。凡十七章。張說撰。

迎神用永和 三章

肅九室。諧八音。歌皇慕。動神心。禮宿設。樂妙尋。聲明備。裸奠臨。

律迓氣。音入元。振玉几。御黼筵。聆愾息。優周旋。九韶遍。百福傳。信工祝。永頌聲。來祖考。聽和平。相百辟。貢九瀛。神休委。帝孝成。

皇帝行用太和

時文聖后。清廟肅邕。致誠勤薦。在貌思恭。玉節肆夏。金鏘五鐘。繩繩雲步。穆穆天容。

登歌酌瓚用肅和

天子孝享。工歌溥將。躬灌鬱鬯。乃焚膋薌。臭以達陰。聲以求陽。奉時烝嘗。永代不忘。

迎俎用雍和 二章

在滌嘉豢。麗碑敬牲。角握之牝。色純之駢。火傳陽燧。木
漑陰精。太公胖俎。傳說和羹。
俎豆有馥。齊盛潔豐。亦有和羹。既戒既平。鼓鐘管磬。肅
唱和鳴。皇皇后祖。來我思成。

皇帝酌醴齊用文舞 闕曲名

聖謩九德。真言五千。慶集昌胄。符開帝先。高文杖鉞。克
配彼天。三宗握鏡。六合煥然。帝其承祀。率禮罔愆。圖書
霧出。日月清懸。舞形德類。詠詒功傳。黃龍蜿蟺。彩雲蹁
躚。五行氣順。八佾風宣。介此百祿。於皇萬年。

獻祖宣皇帝室奠獻用光大

肅肅藝祖。滔滔濬源。有雄玉劍。作鎮金門。元王貽緒。后
稷謀孫。肇禋九廟。四海來尊。

懿祖光皇帝室奠獻用長發

具禮崇德。備樂承風。魏推幢主。周贈司空。不行而至。無
成有終。神興王業。天歸帝功。

太祖景皇帝室奠獻用大政

於赫元命。權輿帝文。天齊八柱。地半三分。宗廟觀德。笙
鏞樂勳。封唐之兆。成天下君。

代祖元皇帝室奠獻用大成

帝舞季歷。襲聖生昌。后歌有蟠。胎炎孕黃。天地合德。日月齊光。肅雍孝享。祚我萬方。

高祖神堯皇帝室奠獻用大明

赤精亂德。四海困窮。黃旗義舉。三靈會同。早望春雨。雲披大風。溥天來祭。高祖之功。

太宗文武聖皇帝室奠獻用崇德

皇合一德。朝宗百神。削平天地。大拯生人。上帝配食。單于入臣。戎歌陳舞。晔晔震震。

高宗天皇大帝室奠獻用鈞天

高皇邁道。端拱無爲。化懷獯鬻。兵賦勾驪。禮尊封禪。樂

盛來儀。合位媯后。同稱伏羲。

中宗孝和皇帝室奠獻用太和

退居江水。鬱起丹陵。禮物還舊。朝章中興。龍圖友及。駿命恭膺。鳴球香瓊。大禧是承。

睿宗大聖皇帝室奠獻用景雲

景雲霏爛。告我帝符。噫帝冲德。與天爲徒。笙鏞遙遠。俎豆虛無。春秋孝獻。廻復此都。

寶應以後太廟樂章

案唐書樂志曰。代宗寶應以後。續造享太廟樂章。元宗至道大聖大明孝皇帝室。奠獻用廣運之舞。

肅宗文明武德大聖大宣孝皇帝室。奠獻用維新之舞。代宗睿文孝武皇帝室。奠獻用保大之舞。德宗神武孝文皇帝室。奠獻用文明之舞。順宗至德大聖大安孝皇帝室。奠獻用大順之舞。憲宗聖神章武孝皇帝室。奠獻用象德之舞。皇帝飲福受胙用福和之樂。送文舞出迎武舞入用舒和之樂。亞獻終獻行事武舞用凱安之樂。徹豆登歌。送神用永和之樂。凡一十四章。郭子儀等撰。又案郭茂倩樂府。並載穆宗用和寧之舞。武宗用大定之舞。昭宗用咸寧之舞。宣宗懿宗。有舞辭而其名不傳。凡

五章。今俱採入備考。

元宗孝皇帝室。奠獻用廣運。

郭子儀撰

於赫皇祖。昭明有融。惟文之德。惟武之功。河海靜謐。車書混同。虔恭孝享。穆穆元風。

肅宗孝皇帝室。奠獻用維新。

劉晏撰

漢祚惟永。神功中興。風驅氛祲。天覆黎烝。三光再朗。庶績其凝。重熙累葉。景命是膺。

代宗孝武皇帝室。奠獻用保大。

郭子儀撰

於穆文考。聖神昭彰。簫勺群慝。含光遠方。萬物茂遂。九夷賓王。悃悃雲韶。德音不忘。

德宗孝文皇帝室奠獻用文明 鄭餘慶撰

開邸除暴。時邁助尊。三元告命。四極駿奔。金枝翠葉。輝燭瑤琨。象德億載。貽慶湯孫。

順宗孝皇帝室奠獻用大順 鄭綱撰

於穆時文。受天明命。允恭元默。化成理定。出震嗣德。應乾傳聖。猗歟緝熙。千億流慶。

憲宗孝皇帝室奠獻用象德 段文昌撰

肅肅清廟。登顯至德。澤周八荒。兵定四極。生物咸遂。羣盜滅息。明聖欽承。子孫千億。

皇帝飲福受胙用福和

備禮用樂。崇親致尊。誠通慈降。敬徹愛存。獻懷稱壽。碎

感承恩。皇帝孝德。子孫千億。大包天域。長亘不極。

文舞出武舞入用舒和

六鐘翕協。六變成。八佾徜徉。八風生。樂九韶兮人神感。美七德兮天地清。

亞終獻行事武舞用凱安 四章

瑟彼瑤爵。亞維上公。室如屏氣。門不容躬。禮殷其本。樂執其中。聖皇永慕。天地幽通。

禮匝三獻。樂遍九成。降循軒陛。仰歆皇情。福與仁合。德因孝明。百年神畏。四海風行。

總總干戚。填填鼓鐘。奮揚增氣。坐作為容。離若鷺鳥。合如戰龍。萬方觀德。肅肅邕邕。

烈祖順三靈。文宗威四海。黃鉞誅羣盜。朱旗掃多罪。戢兵天下安。約法人心改。大哉干羽意。長見風雲在。

徹豆登歌

曲名闕

止笙磬。徹豆籩。廓無響。宵入元。主在室。神在天。情餘慕。禮罔愆。喜黍稷。屢豐年。

送神用永和

眇嘉樂。授靈爽。感若來。思如往。休氣散。迴風上。返寂寞。還惚恍。懷靈駕。結空想。

穆宗用和寧

牛僧孺撰

湜湜頎頎。融昭德輝。不紐不舒。貫成九圍。武烈文經。敷施當宜。纂堯付啓。億萬熙熙。

武宗用大定

李回撰

受天明命。敷祐下土。化時以儉。衛文以武。氛消夷夏。俗臻往古。億萬斯年。形于律呂。

宣宗

有辭闕名夏侯攷撰

於鑠令主。聖祚重昌。興起教義。申明典章。俗尚素樸。人皆樂康。積德可報。流慶無疆。

懿宗

有辭闕名蕭倣撰

聖祚無疆。慶傳樂章。金枝繁茂。玉葉延長。海瀆常晏。波濤不揚。汪汪美化。垂範今王。

昭宗用咸寧 撰者闕名

於鑠丕嗣。惟帝之光。羽籥象德。金石薦祥。聖系無極。景命永昌。神降上哲。維天配長。

唐儀坤廟樂章

案唐書樂志曰。儀坤廟。迎神用永和之樂。次金奏。皇帝行用太和之樂。酌獻登歌用肅和之樂。迎俎用雍和之樂。肅明皇后室。酌獻用昭升之舞。昭成皇后室。酌獻用坤貞之舞。飲福用壽和之樂。送文舞出迎武

舞入用舒和之樂。武舞用安和之樂。徹俎用雍和之樂。送神用永和之樂。凡十二章。徐彥伯等撰。

迎神用永和 徐彥伯撰

林鐘宮

猗若清廟。肅肅熒熒。國薦嚴祀。坤興淑靈。有儿在室。有樂在庭。臨茲孝享。百祿惟寧。

金奏 撰者闕名

夷則宮

陰靈効祉。軒耀降精。祥符淑氣。慶集柔明。瑤俎既列。雕桐發聲。徽猷永遠。比德皇英。

皇帝行用太和 邱說撰

黃鐘宮

孝哉我后。冲乎乃聖。道映重華。德輝文命。慕深視篋。情殷撫鏡。萬國移風。兆人承慶。

酌獻登歌用肅和 張齊賢撰

仲呂均之太簇又側注曰一云蕤賓均之夾鐘

羽

裸圭既濯。鬱鬯既陳。畫幕雲舉。黃流玉醇。儀充獻酌。禮盛衆禋。地察惟孝。愉焉饗親。

迎俎用雍和 鄭善玉撰

姑洗羽

酌鬱既灌。取蕭方藝。籩豆靜嘉。簠簋芬飶。魚腊薦美。牲牲表潔。是戢是將。載迎載列。

肅明皇后室酌獻用昭升 薛稷撰

林鐘宮

陽靈配德。陰魄昭升。堯壇鳳下。漢室龍興。倪天作對。前旒是凝。化行南國。道盛西陵。造舟集灌。無德而稱。我粢既潔。我醴既澄。陰陰靈廟。光靈若憑。德馨惟饗。孝思烝烝。

昭成皇后室酌獻用坤貞 撰者闕名

乾道既亨。坤元以貞。肅雍攸在。輔佐斯成。外睦九族。內光一庭。克生睿哲。祚我休明。欽若徽範。悠哉淑靈。建茲清宮。于彼上京。縮茅以獻。潔秬惟馨。實受其福。期乎億齡。

飲福用壽和 徐堅撰

黃鐘宮

於穆清廟。肅雍嚴祀。合福受釐。介以繁祉。

文舞出武舞入用舒和 胡雄撰

南呂商

送文迎武。遞參差。一始一終。光聖儀。四海生人。歌有慶。

千齡孝享。肅無虧。

武舞用安和 劉子元撰

太簇徵

妙算申帷幄。神謀出廟庭。兩階文物備。七德武功成。校獵長楊苑。屯軍細柳營。將軍獻凱入。歌舞溢重城。

徹俎用雍和 員半千撰

蕤賓均之夾鐘羽

孝享云畢。維徹有章。雲感元羽。風悽素商。瞻望神座。祇戀匪遑。禮終樂闋。肅雍鏘鏘。

送神用永和 祝欽明撰

林鐘宮

闕宮實實。清廟微微。降格無象。馨香有依。式昭纂度。方融嗣徽。明禋是享。神保聿歸。

又儀坤廟樂章

案唐書樂志曰。太樂又有儀坤廟樂章。迎神送神凡二章。餘與前同。

迎神

月靈降德。神元授光。娥英比秀。姪姒均芳。瑤臺薦祉。金屋延祥。迎神有樂。歆此嘉蔭。

送神

玉帛儀大。金絲奏廣。靈應有孚。冥徵不爽。降彼休福。歆茲禋享。送樂有章。神麾其上。

昭德皇后廟樂章

案唐書樂志曰。昭德皇后室。迎神用永和之樂。登歌酌鬯用肅和之樂。迎俎用雍和之樂。酌獻用坤元之樂。送文舞出迎武舞入用舒和之樂。武舞用凱安之樂。徹俎用雍和之樂。送神用永和之樂。其飲福用壽和之樂。史闕。今採郭茂倩樂府補入。凡九章。其辭內出。

迎神用永和

御製律呂正統編卷三十三
穆清廟。薦嚴禋。昭禮備。和樂新。望靈光。集元辰。祚無極。享萬春。

登歌酌鬯用肅和

誠心達。娛樂分。升蕭鬯。鬱氛氲。茅旣縮。鬯旣薰。后來思。福如雲。

迎俎用雍和

我將我享。盡明而誠。載芬黍稷。載滌犧牲。懿矣元良。萬邦以貞。心乎愛敬。若覩容聲。

酌獻用坤元

於穆先后。儷聖稱崇。母臨萬寓。道被六宮。昌時協慶。理

內成功。殷薦明德。傳芳國風。

飲福用壽和

工祝致告。徽音不遐。酒醴咸旨。馨香具嘉。受釐獻祉。永慶邦家。

文舞出武舞入用舒和

金枝羽部。輟清歌。瑤堂肅穆。笙磬羅。諧音遍響。合明意。萬類昭融。靈應多。

武舞用凱安

辰位列四星。帝功參十亂。退賢勤內輔。扈蹕清多難。承天厚載均。並曜霄光燦。留徽邁前躅。萬古披圖煥。

徹俎用雍和

公尸既起。享禮載終。祠歌進徹。盡敬由衷。澤流惠下。大小咸同。

送神用永和

昭事終。幽享餘。移月御。返仙居。璇庭寂。靈幄虛。顧徘徊。感皇儲。

唐讓皇帝廟樂章

案讓皇帝廟樂章。史不載。今從郭茂倩樂府採入。迎神。奠幣。迎俎。酌獻。亞終獻。送神。凡六章。李舒撰。

迎神

皇矣天宗。德先王季。因心則友。克讓以位。爰命有司。式遵前志。神其降靈。昭饗祀事。

奠幣

惟帝時若。去而上仙。祀用商武。樂備宮懸。白璧加薦。元纁告虔。子孫拜後。承茲吉蠲。

迎俎

祀盛體薦。禮協粢盛。方周假廟。用魯純牲。捧徹祇敬。擊拊和鳴。受釐歸胙。既戒而平。

酌獻

八音具舉。三壽既盥。潔茲宗彝。瑟彼圭瓚。蘭肴重錯。椒

醑飄散。降祚維城。永爲藩翰。

亞終獻

秩禮有序。和音旣同。九儀不忒。三揖將終。孝感藩后。相維辟公。四時之典。永永不窮。

送神

奠獻已事。昏昕載分。風搖雨散。靈衛網緼。龍駕帝服。上騰五雲。泮宮復闕。寂寞無聞。

唐隱太子廟樂章

案唐書樂志曰。太宗貞觀中。享隱太子廟。迎神用誠和之樂。送神辭同。登歌奠玉帛用肅和之樂。迎俎用

雍和之樂。送文舞出迎武舞入用舒和之樂。武舞用凱安之樂。凡五章。

迎神用誠和

道闕鶴關。運纏鳩里。門集大命。俾歆嘉祀。禮亞六瑚。誠殫二簋。有誠顒若。神斯戾止。

登歌奠玉帛用肅和

歲肇春宗。乾開震長。瑤山旣寂。戾園斯享。王肅其事物。昭其象。絃誦成風。笙歌合響。

迎俎用雍和

明典肅陳。神居邃啓。春伯聯事。秋官相禮。有來雍雍。登

歌濟濟。緬惟主鬯。庶歆芳醴。

文舞出武舞入用舒和

三縣已判歌鐘列。八佾將開羽鉞分。尚想燕飛來蔽日。終疑鶴影降凌雲。

武舞用凱安

天步昔將開。商郊初欲踐。撫戎金陣廓。貳極瑤圖闡。雞戟遂崇儀。龍樓期好善。弄兵隕震業。啓聖隆祠典。

又隱太子廟樂章

案唐書樂志曰。太樂舊有隱太子廟。迎神送神辭。凡二章。不詳所起。

迎神

蒼震有位。黃離蔽明。江充禍結。戾據災成。銜怨昔痛。贈典今榮。享靈有秩。奉樂以迎。

送神

皇情悼往。祀儀增設。鐘鼓鏗鏗。羽旄昭晰。掌禮云備。司筮告徹。樂以送神。靈其鑒閱。

章懷太子廟樂章

案唐書樂志曰。神龍初。享章懷太子廟。迎神第一。

登歌酌鬯第二。迎俎酌獻第三。送文舞出迎武舞入第四。武舞作第五。送神第六。辭同隱廟。凡五章。

迎神

姑洗

副君昭象。道應黃離。銅樓備德。玉裕成規。仙氣靄靄。靈從師師。前驅戾止。控鶴來儀。

登歌酌鬯

南呂均之蕤賓羽

忠孝本著。羽翼先成。寢門昭德。馳道為程。幣帛有典。容衛無聲。司存既肅。廟享惟清。

迎俎酌獻

大呂羽

通三錫胤。明兩承英。太山比赫。伊水聞笙。宗祧是寄。禮樂其亨。嘉辰薦俎。以發聲明。

文舞出武舞入

蕤賓商

羽籥崇文禮以畢。干鉞奮武事將行。用捨由來其有致。壯志宣威樂太平。

武舞作

夷則角

綠林熾炎歷。黃虞格有苗。沙塵驚塞外。帷幄命嫖姚。七德干戈止。三邊雲霧消。寶祚長無極。歌舞盛今朝。

懿德太子廟樂章

案唐書樂志曰。神龍初。享懿德太子廟。迎神第一。登歌酌鬯第二。迎俎酌獻第三。送文舞迎武舞第四。武舞作第五。送神第六。辭同隱廟。凡五章。

迎神

姑洗宮

甲觀昭祥。畫堂升位。禮絕羣后。望尊儲貳。啓誦慚德。莊丕掩粹。伊浦鳳翔。緱峰鶴至。

登歌酌鬯

南宮均之。蕤賓羽

譽闡元儲。寄崇明兩。玉裕雖晦。銅樓可想。絃誦輟音。笙歌罷響。幣帛言設。禮容無爽。

迎俎酌獻

大呂羽

雍雍盛典。肅肅靈祠。賓天有聖。對日無期。飄飄羽服。掣曳雲旗。眷言主鬯。心乎愴茲。

送文舞迎武舞

蕤賓商

八音協奏。陳金石。六佾分行。整禮容。滄溟赴海。還稱少。素月開輪。卽是重。

武舞作

夷則角

隋季昔云終。唐年初啓聖。纂戎將禁暴。崇儒更敷政。威略靜三邊。仁恩覃萬姓。

節愍太子廟樂章

案唐書樂志曰。景雲中。享節愍太子廟。迎神第一。

登歌酌鬯第二。迎俎酌獻第三。送文舞迎武舞第

四。武舞作第五。送神第六。辭同隱廟。凡五章。

迎神

姑洗宮

儲后望崇。元良寄切。寢門是仰。馳道不絕。仙袂雲會。靈旗電晰。煌煌而來。禮物攸設。

登歌酌鬯

南呂均之蕤賓

灼灼重明。仰承元首。既賢且哲。惟孝與友。惟孝雖遙。靈規不朽。禮因誠致。備絜元酒。

迎俎酌獻

大呂羽

嘉薦有典。至誠莫騫。畫梁雲亘。雕俎星聯。樂器周列。禮容備宣。依稀如在。若未賓天。

送文舞迎武舞

蕤賓商

邕邕闡化憑文德。赫赫宣威藉武功。既執羽旄先拂吹。還持玉鉞更揮空。

武舞作

夷則角

武德諒雄雄。由來掃寇戎。劒光揮作電。旗影列成虹。霧廓三邊靜。波澄四海同。睿圖今已盛。相共舞皇風。

文恭太子廟樂章

案文恭太子廟樂章。史不載。今從郭茂倩樂府採

入。請神。登歌。迎俎酌獻。退文舞。迎武舞。亞終獻。送

神。凡六章。許孟容陳京等撰。

請神

許孟容撰

觴牢具品。磬管有節。祝道寅恭。神儀昭晰。桐珪早貴。象輅追設。罄達樂成。降歆豐潔。

登歌

陳京撰

歌以德發。聲以樂貴。樂善名存。追仙禮異。鸞旌拱修。鳳鳴合次。神聽皇慈。仲月皆至。

迎俎酌獻

馮伉撰

撰日瞻景。誠陳張樂。禮容秩秩。羽舞煌煌。肅將滌濯。祇

御製律呂正統編
卷之三
薦芬芳。永錫繁祉。思深享嘗。

退文舞迎武舞

撰者闕名

千旄羽籥相虧蔽。一進一退殊行綴。昔獻三雍盛禮容。今陳六佾崇儀制。

亞終獻

崔邠撰

醴齊泛罇彝。軒縣動干戚。入室儼如在。升階虔所歷。奮疾合威容。定利舒皦繹。方崇廟貌禮。永被君恩錫。

送神

張薦撰

三獻具舉。九旗將旋。追勞表德。罷享賓天。風引仙管。堂虛畫筵。芳馨常在。瞻望悠然。

惠昭太子廟樂章

案惠昭太子廟樂章。史不載。今從郭茂倩樂府採入。請神。登歌。迎俎酌獻。退文舞迎武舞。亞終獻。送神。凡六章。歸登杜羔等撰。

請神

歸登撰

嘉薦既陳。祀事孔明。間歌在堂。萬舞在庭。外則盡物。內則盡誠。鳳笙如聞。歆其潔精。

登歌

杜羔撰

因心克孝。位震遺芬。賓天道茂。軫懷氣分。發祇乃祀。咳歎如聞。二歌斯升。以詠德薰。

迎俎酌獻 李逢吉撰

既潔酒醴。聿陳熟腥。肅將震念。昭格儲靈。展矣禮典。薰然德馨。悒悒管磬。亦具是聽。

退文舞迎武舞 孟簡撰

喧喧金石容。既缺肅肅羽。駕就行列。緱山遺響。昔所聞。廟庭進旅。今攸設。

亞終獻 裴度撰

重輪始發祥。齒胄方興學。冥然紫府升。鏗爾薦清樂。奠聳致馨香。在庭紛羽籥。禮成神既醉。髣髴緱山鶴。

送神 王涯撰

威儀畢陳。備樂將闋。苞茅酒縮。管蕭香徹。官臣展事。肅雍在列。迎精送往。厥鑒昭晰。

唐太清宮樂章

案唐書禮儀志曰。元宗開元二十年正月。詔兩京諸州。置元元廟。天寶二年三月。以西京元元廟為太清宮。其樂章。降仙聖奏煌煌。發爐奏沖和。上香畢。奏紫極舞。序入破三奏。撤醮奏登歌。送仙聖奏真和。凡十。一章。案唐以老子為元元皇帝。故其樂章。附於唐宗廟樂之末。撰者未詳。

煌煌道宮。肅肅太清。禮光尊祖。樂備充庭。罄竭誠至。希
夷降靈。雲凝翠蓋。風燄紅旌。衆真以從。九奏初迎。永惟
休祐。是錫和平。
發爐奏冲和。奏焘燁燁。奏登烟。奏前聖。奏真。奏八十
虛無結想。鐘磬和音。歌以頌德。香以達心。禮殊裸鬯。義
感昭臨。雲車至止。慶垂悃悃。
案香初上
肅肅我祖。縣縣道宗。至感潛達。靈心暗通。雲駢御氣。芝
蓋隨風。四時禋祀。萬國來同。

再上

仙宗績道。我李承天。慶深虛極。符光象先。俗登仁壽。化
闡壇涓。五年貽範。億萬斯年。

終上

不宰元功。無爲上聖。洪源長發。誕受天命。金奏迎真。璇
宮展盛。備禮周樂。垂光儲慶。

紫極舞

至道生元氣。重圓法混成。無爲觀大象。冲用體常名。仙
樂臨丹闕。雲車出玉京。靈符百代應。瑞節九真迎。寶運
開皇極。天臨映太清。長垂一德慶。永此萬方寧。

序入破第一奏

真宗開妙理。冲教統清虛。化演無為日。言昭有象初。瑤壇肅靈瑞。金闕映仙居。一奏三清樂。長回八景輿。

第二奏

虛極仙宗本。希夷象帝先。百靈朝太上。萬法祖重圓。善貨惟冲德。功成謂自然。雲門達和氣。思用合鈞天。

第三奏

元符傳紫極。寶祚啓高真。道德先垂裕。冲和已化淳。人風齊太古。天瑞叶惟新。仙樂清都上。長明交泰辰。

徹醮奏登歌

嚴禋展事。禮潔蒸嘗。皇矣聖祖。德惟馨香。盛薦既徹。歌

工再揚。大來之慶。降福穰穰。

送仙聖奏真和

玉磬含響。金鑪既馥。風馭泠泠。雲壇肅肅。杳歸大象。霈流嘉福。俾寧萬邦。無思不服。

唐德明興聖廟樂章

案唐書禮儀志曰。元宗天寶二年三月追尊臯繇為德明皇帝。涼武昭王為興聖皇帝。其廟樂。第一迎神。第二登歌。奠幣。第三迎俎。第四酌獻。第五亞獻。終獻。第六送神。凡七章。李舒撰。

迎神

御製律呂正統編卷三十三
元尊九德。佐堯光宅。烈祖太宗。方周作伯。響懷霜露。樂
變金石。白雲清風。髣髴來格。

登歌奠幣

四時有典。百事來祭。尊祖奉宗。嚴禋大帝。禮先蒼璧。奠
備黜制。於萬斯年。熙成帝系。

迎俎

盛牲實俎。涓選休成。鼎燧陽燧。玉盥陰精。有飶嘉豆。既
和大羹。侑以清樂。細齊人情。

德明神室酌獻

清廟奕奕。和樂雍雍。器尊犧象。禮屬宗公。白水方禩。黃

流在中。謨明之德。萬古清風。

興聖神室酌獻

闕宮靜謐。合樂周張。泰尊始獻。百末重觴。震澹存誠。庶
幾廸嘗。遙源之祚。天漢靈長。

亞終獻

惟清惟肅。靡聞靡見。舉備九成。俛終三獻。慶彰曼壽。昨
撤嘉薦。瘞玉埋牲。禮神斯徧。

送神

元精回復。靈貺繁滋。風灑蘭路。雲搖桂旗。高邱緬邈。涼
部透漉。瞻望靡及。纏綿永思。

御製律呂正義後編卷之一百四

樂章考十二 宗廟

梁

後唐

後漢

後周

宋一

五代宗廟樂章

梁唐晉漢周土宇分裂。人民塗炭。雖鼓鐘鏗鉦。其如樂何。夷考五代史。樂章亦不載。郭茂倩樂府。援据唐餘錄編次之。茲並採入。以補史宬之闕。

梁太廟樂舞辭

案唐餘錄曰。梁太廟樂。迎神奏開平之舞。皇帝行。帝盥。登歌。俱曲名闕。獻肅祖奏大合之舞。恭祖奏象功之舞。憲祖奏來儀之舞。烈祖奏昭德之舞。飲福。徹豆。送神。俱曲名闕。凡十一章。

迎神奏開平

黍稷馨。醑醴清。牲牲潔。金石鏗。恭祀事。結皇情。神來格。歌頌聲。

皇帝行

莫高者天。攀躋弗克。躋天有方。累仁積德。祖宗隆之。子孫履之。配天明祀。永永孝思。

帝盥

莊肅蒞事。周旋禮容。裸鬯嚴潔。穆穆雍雍。

登歌

於赫我皇。建中立極。動以武功。靜以文德。昭事上帝。歡心萬國。大報嚴禋。四海述職。

其制肅祖奏大合

於穆皇祖。濬哲雍熙。美溢中夏。化被南陲。后稷累德。公劉創基。肇興九廟。樂合來儀。

恭祖奏象功

天地合德。睿聖昭彰。累贈太傅。俄登魏王。雄名不朽。奕葉而光。建國之兆。君臨萬方。

聖王憲祖奏來儀

於赫帝命。應天順人。亭育品彙。賓禮百神。洪基永固。景命維新。肅恭孝享。祚我生民。

肅祖奏昭德

御製禮記正義 後

卷一百一十五

樂章考十二

三

肅肅文考。源濬派長。漢稱誕季。周實生昌。奄有四海。超彼百王。笙鏞迭奏。禮物熒煌。

戛玉攬金。永頌聲。糜絲孤竹。和且清。靈歆醉止。犧象盈。自天降福。千萬齡。

笙鏞洋洋。庭燎煌煌。明星有爛。祝史下堂。籩豆斯徹。禮容有章。克勤克儉。無怠無荒。

其降無從。其往無蹤。黍稷非馨。有感必通。赫奕令德。髣髴睟容。再拜恍惚。遐想昊穹。

後唐六室樂舞辭

案唐餘錄曰。後唐並用唐樂。無所變更。惟別造六室舞辭。懿祖室奏昭德之舞。獻祖室奏文明之舞。太祖室奏應天之舞。昭宗室奏永平之舞。以上撰者闕名。莊宗室奏武成之舞。明宗室奏雍熙之舞。凡六章。

懿祖室奏昭德

懿彼明德。赫赫煌煌。名高閩域。功著旂常。道符休泰。運叶祺祥。慶傳萬祀。以播耿光。

獻祖室奏文明

帝業光揚。皇圖翕赫。聖德孔彰。神功不測。信及豚魚。恩霑動植。懿範鴻名。傳之萬億。

太祖室奏應天

晉國肇興。雄圖再固。黼黻帝道。金玉王度。皇天無親。惟德是輔。載誕英明。永光聖祚。

昭宗室奏永平

慶傳寶祚。位正瑤圖。功宣四海。化被八區。靜彰帝道。動合乾符。千秋萬祀。永荷昭蘇。

莊宗室奏武成 崔居儉撰

艱難王業。返正皇唐。先天載造。却日重光。漢紹世祖。夏

資少康。功成德茂。率祀無疆。

明宗室奏雍熙 盧文紀撰

仁君御宇。寰海謐清。運符武德。道協文明。九功式叙。百度惟成。金門積慶。玉葉傳榮。

漢宗廟樂舞辭

案唐餘錄曰。高祖追尊四祖廟。且遠引漢之二祖為六室。張昭因傳會其禮。乃曰。太祖高皇帝創業垂統。室。奏武德之舞。世祖光武皇帝再造丕基室。奏大武之舞。即用東平王蒼辭。文祖室奏靈長之舞。德祖室奏積善之舞。翼祖室奏顯仁之舞。顯祖室奏章慶之

舞。高祖室奏觀德之舞。凡六章。惟觀德舞辭。注張昭撰。餘皆不詳。第昭既經傳會。其識名末章者。或其辭皆昭作也。

太祖室奏武德

明明我祖。天集休明。神母夜哭。彤雲晝興。籩豆有踐。管籥斯登。孝孫致告。神其降靈。

文祖室奏靈長

天降祥。漢祚昌。火炎上。水靈長。建廟社。潔蒸嘗。羅鐘石。儼珩璜。陳玉豆。酌金觴。氣昭感。德馨香。祇洛汭。瞻晉陽。降吾祖。福穰穰。

德祖室奏積善

黍稷斯馨。祖德惟明。虵告赤帝。龜謀大橫。雲行雨施。天平地成。造我家邦。幹我璿衡。陶匏在御。醜盜惟精。或戛或擊。載炮載烹。飲福受胙。舞降歌迎。滔滔不竭。洪惟水行。

翼祖室奏顯仁

運極金行。謝天資水德。隆禮神廊。時館布政。未央宮。詰旦脩明祀。登歌答茂功。雲駟臨降久。星俎薦陳豐。藹藹沉檀霧。鏘鏘環珮風。熒煌昇藻藉。肸鬻轉珠權。尊祖咸韶備。貽孫書軌同。京坻長有積。宗社享無窮。

顯祖室奏章慶

采恩曉唱雞人。三牲八簋斯陳。霧集瑤階瑣闥。香生綺
席華茵。珠珮貂璫熠燿。羽旄干戚紛綸。酌鬯既終三獻。
凝旒何止千春。阿閣長棲綵鳳。郊宮叠奏祥麟。赤伏英
靈未泯。元珪運祚重新。玉笋犧尊簞灑。龍旂鳳轄逡巡。
瞻望月游冠冕。猶疑蒼野回輪。

高祖室奏觀德 張昭撰

高廟明靈再啓圖。金根玉輅幸神都。巢阿丹鳳銜書命。
入昴飛星獻寶符。正撫薰弦娛赤子。忽登僊駕泣蒼梧。
薦櫻鶴館笳簫咽。酌鬯金楹劍珮趨。星俎雲壘兼魯禮。
朱干象箭雜巴渝。氤氲龍麝交青瑣。髣髴錫鑾下藻珠。
薦豆奉觴親玉几。配天合祖耀璿樞。受釐飲酒皇歡洽。
仰俟餘靈泰九區。

周宗廟樂舞辭

案唐餘錄曰。周宗廟樂。降神奏肅順之樂。皇帝行奏
治順之樂。獻信祖室奏肅雍之舞。僖祖室奏章德之
舞。義祖室奏善慶之舞。慶祖室奏觀成之舞。太祖室
奏明德之舞。世宗室奏定功之舞。辭闕。酌獻登歌奏
感順之樂。迎俎奏禋順之樂。飲福奏福順之樂。送文
舞迎武舞奏忠順之樂。武舞奏善勝之舞。徹俎奏禋

順之樂。送神奏肅順之樂。樂以順名自周始。凡十四章。

降神奏肅順

我后至孝。祇謁祖先。仰瞻廟貌。夙設宮縣。朱弦疏越。羽舞回旋。神其來格。明祀惟虔。

皇帝行奏治順

清廟將入。衮服是依。載行載止。令色令儀。永終就養。空極孝思。瞻望如在。顧復長違。

信祖室奏肅雍

周道載興。象日之明。萬邦咸慶。百穀用成。於穆聖祖。祇薦鴻名。祀于廟社。陳其犧牲。進旅退旅。皇舞之形。一唱三歎。朱弦之聲。以妥以侑。既和且平。至誠潛達。介福攸寧。

僖祖奏章德

清廟新。展嚴禋。恭祖德。厚人倫。雅樂薦。禮器陳。儼皇尸。列虞賓。神如在。聲不聞。享必信。貌惟夤。想龍服。奠犧樽。禮既備。慶來臻。

義祖室奏善慶

卜世長。帝祚昌。定中國。服四方。脩明祀。從舊章。奏激楚。轉清商。羅俎豆。列簪裳。歌纍纍。容皇皇。望來格。降休祥。

祝敢告壽無疆。

慶祖室奏觀成

穆穆王國。奕奕神功。茲祀載展。明德有融。彝樽斯滿。簋
簋斯豐。紛絺旄羽。鏘洋磬鐘。或昇或降。克和克同。孔惠
之禮。必肅之容。錫以純嘏。祚其允恭。神保是饗。萬世無
窮。

太祖室奏明德

惟彼岐陽。德大流光。載造周室。澤及遐荒。於鑠聖祖。上
帝是皇。迺聖迺神。知微知章。新廟奕奕。豐年穰穰。取彼
血膋。以往蒸嘗。黍稷惟馨。籩豆大房。工祝致告。受福無

疆。

酌獻登歌奏感順

萬舞咸列。三階克清。貫珠一倡。擊石九成。盈觴雖酌。靈
坐無形。永懷我祖。達其孝誠。

迎俎奏禋順

旨酒既獻。嘉肴乃迎。振其鼗鼓。絜以鉶羹。肇禋肇祀。或
炮或烹。皇尸儼若。保饗是明。

飲福奏福順

新廟奕奕。金奏洋洋。享于祖考。循彼典章。清醑特滿。嘉
玉騰光。神醉既告。帝祉無疆。

送文舞迎武舞奏忠順

稱文旣表溫柔德。示武須成蹈厲容。綴兆疾舒皆應節。明明我祖樂何窮。

武舞奏善勝

聖祖累功。福鍾來裔。持羽執干。舞文不廢。

徹俎奏禋順

禮畢祀先。香散几筵。舞罷干戚。收徹豆籩。

送神奏肅順

樂奏四順。福受萬年。神歸碧天。庭餘瑞烟。

宋宗廟樂章

宋樂章爲十二安。蓋取治世之音。安以樂之義。祭天爲高安。祭地爲靜安。宗廟爲理安。理安者。其總名也。禮以義起。常享與禘祫不同。樂以時修。祖作與孫述或異。累朝樂曲。詳列於左。

宋祀享太廟樂章

案宋史樂志曰。建隆以來。祀享太廟。迎神用禮安之曲。皇帝行用隆安之曲。奠瓚用瑞木之曲。馴象之曲。玉鳥之曲。奉俎用豐安之曲。酌獻僖祖室用大善之舞。順祖室用大寧之舞。翼祖室用大順之舞。宣祖室用大慶之舞。太祖室用大定之舞。太宗室用大盛之

舞。飲福用禧安之曲。亞獻用正安之曲。終獻用正安之曲。徹豆用豐安之曲。凡一十六章。

迎神用禮安

肅肅清廟。奉祀來詣。格思之靈。如在之祭。克謹威儀。載嚴容衛。降福孔皆。以克永世。

皇帝行用隆安

工祝升階。賓尸在位。祗達孝思。允脩茲祀。顯相有儀。克恭乃事。儼恪其容。通此精意。

奠瓚用瑞木

案瑞木。及下馴象。玉烏。猶漢馬生渥洼水中作

天馬。得鼎汾陰作景星。芝生甘泉齊房作齊房。卽以其瑞。名其曲也。

木符啓瑞。著象成文。於昭大號。協應明君。靈命有屬。鴻禧洞分。歌以升薦。休嘉洽聞。

馴象

嘉彼馴象。來歸帝鄉。南州毓質。中區效祥。仁格巨獸。德柔遐荒。有感斯應。神化無方。

玉烏

素鳥爰止。淳精允臧。名符瑞牒。色應金方。潔白容與。翹英奮揚。孝思攸感。皇德逾張。

奉俎用豐安

維犧維牲。以魚以烹。植其鞀鼓。潔彼劓羹。孔碩茲俎。於穆厥聲。肅雍顯相。福祿來成。

酌獻僖祖室用大善

湯湯洪河。經啓長源。鬱鬱嘉木。挺生本根。大哉崇基。出乎慶門。發祥垂裕。永世貽孫。

順祖室用大寧

元鐘九千。生于仲呂。日臺九層。起于累土。赫日之升。明夷爲主。孝孫作帝。式由祖武。

翼祖室用大順

明明我祖。積德攸宜。肇繼瓜瓞。將隆本支。爰資慶緒。式昭帝基。於穆清廟。永洽重熙。

宣祖室用大慶

艱難積行。綿長鍾慶。同人之時。得主乃定。旣敘宗祧。乃脩舞詠。經武開先。永昭丕命。

太祖室用大定

猗歟太祖。受命于天。化行區宇。功溢簡編。武威震耀。文德昭宣。開基垂統。億萬斯年。

太宗室用大盛

赫赫皇運。明明太宗。四隩咸暨。一變時雍。睿文炳煥。聖

德温恭。千齡萬祀。永播笙鏞。

飲福用禧安

嘉栗旨酒。博膺牲牲。神鑒孔昭。享茲吉蠲。夙夜毖祀。孝以奉先。永錫純嘏。功格于天。

亞獻用正安

已象文治。乃觀武成。進退可度。威儀克明。

終獻用正安

常武徂征。詩人所稱。總干山立。厥象伊凝。

徹豆用豐安

肥腍之牲。既析既薦。鬱鬯之酒。已酌已獻。祀辭亦陳。和

奏斯徧。享禮具舉。徹其有踐。

太廟攝事樂章

案宋史樂志曰。攝事樂章。降神用理安之曲。太尉行用正安之曲。奠瓚用瑞安之曲。奉俎用豐安之曲。酌獻僖祖室用大善之舞。順祖室用大寧之舞。翼祖室用大順之舞。宣祖室用大慶之舞。太祖室用大定之舞。太宗室用大盛之舞。真宗室用大明之舞。徹豆用豐安之曲。送神用理安之曲。凡十三章。周禮曰。太宗伯若王不與祭祀。則攝位。鄭氏註。謂王有故。則代行其祭祀。然則太廟攝事。非禮之

失也。

降神用理安

案降福孔皆二句。與前迎神曲同。

肅肅清廟。昭事祖禰。粢盛苾芬。四海來祭。皇靈格思。令
容有睟。降福孔皆。以克永世。

大尉行用正安

裸鬯溥將。賓尸在位。帝德升聞。孝思光被。公卿庶正。傳
御師氏。至誠感神。福祿來暨。

奠瓚用瑞安

淳清育物。瑞木成文。元氣陶冶。非烟郁氛。元貺昭格。至

和所熏。登歌裸獻。肝鬻如聞。

奉俎用豐安

麗碑割牲。以魚以烹。博碩肥膃。薦羞神明。祖考來格。享
于克誠。如聞警欬。式燕以寧。

酌獻僖祖室用大善

肅肅藝祖。肇基鴻源。權輿光大。燕翼貽孫。載祀惟永。慶
流後昆。威靈在天。顧我思存。

順祖室用大寧

思文聖祖。長發其祥。錫羨蕃衍。德厚流光。眷命自天。卜
世聿昌。祇肅孝享。降福無疆。

翼祖室用大順

明明我祖。積德累仁。居晦匿耀。邁積惟勤。帝圖天錫。輝光日新。寢廟繹繹。昭事同寅。

宣祖室用大慶

泱泱我祖。時惟鷹揚。潛德弗耀。發源靈長。肆類配天。永思不忘。來顧來享。百福是將。

太祖室用大定

赫赫太祖。受命于天。赤符啟運。威加八埏。神武勘難。功無間然。翼翼承承。億萬斯年。

太宗室用大盛

穆穆太宗。與天合德。昧旦丕顯。乾乾翼翼。敷佑下民。時帝之力。永懷聖神。孝思罔極。

真宗室用大明

煌煌真宗。善繼善承。經武耀德。臻于治平。封祀禮樂。丕昭鴻名。陟配文廟。皇圖永寧。

徹豆用豐安

鼎俎既陳。籩豆既設。金玉在庭。師工就列。備物有嚴。著誠致潔。孝惟時思。禮以雍徹。

送神用理安

神之來兮。風肅然。神之去兮。升九天。排凌兢兮。還恍惚。

羽旄紛兮蕭燔烟。

御製宗廟樂章

案宋史樂志曰。真宗御製宗廟樂章。奠瓚用萬國朝天。亞終獻用平晉樂。凡二章。

奠瓚用萬國朝天

鴻源濬發。睿圖誕彰。高明錫羨。累洽延祥。巍巍藝祖。溥率賓王。煌煌文考。區宇大康。珍符昭顯。寶歷綿長。物性茂遂。民俗阜昌。甫田多稼。禾黍穰穰。蒼生嘉育。鳥獸踰踰。八紘統域。九服要荒。沐浴惠澤。祇畏典常。隔谷分壤。望斗辨方。並襲冠帶。來奉圭璋。峩峩雙闕。濟濟明堂。諸

侯執帛。天后當陽。何以辨等。衮衣繡裳。何以褒德。路車乘黃。聲明煥赫。雅頌汪洋。啟茲丕緒。佑我無疆。大統斯集。大樂斯揚。俯隆宗祏。仰繼穹蒼。

亞終獻用平晉樂

五代衰替。六合攜離。封疆竊據。兵甲競馳。天顧黎獻。塗炭可悲。帝啟靈命。濬哲應期。皇祖丕變。金鉞俄麾。率土執贄。獷俗來儀。瞻彼大鹵。竊此餘基。獨述文告。莫畏天威。神宗繼統。璿圖有輝。尚安蠢爾。罔懷恪思。六飛夙駕。萬旅奉辭。徯來發詠。不陣行師。雲旗先路。壺漿塞岐。天臨日照。宸慮通微。前歌後舞。人心悅隨。要領自得。智力

御製律呂正統後 卷二 樂章考十二
何施。風移潛冒。政治淳熙。書文混一。盛德咸宜。干戈倒
載。振振言歸。誕昭七德。永定九圍。

親享太廟樂章

案宋史樂志曰。景祐親享太廟。迎神用興安之曲。
酌獻真宗室用大明之曲。凡二章。餘悉從舊。書親
享者。別於攝事也。

迎神用興安

追養奉先。納孝練主。金奏鳳鳴。關雎樂舞。奠鬯恭神。肥
膾展俎。積慶聰明。降景寰宇。

酌獻真宗室用大明

於穆真皇。宅心道粹。和戎偃革。煥乎文治。操瑞拜圖。封
天祀地。盛德爲宗。蒸嘗萬世。

常祀五享樂章

案宋史樂志曰。常祀五享。迎神用興安之曲。太尉
奠瓚用嘉安之曲。送神用興安之曲。凡三章。五享
者。一年五祭也。四孟及臘。謂之五享云。

迎神用興安 九變

奕奕清廟。昭穆定位。霜露增感。粢盛潔祭。神靈來格。福
祉攸暨。追考奉先。本支百世。

太尉奠瓚用嘉安

有秩時祀。匪怠匪瀆。有來宗工。載祗載肅。厥作裸將。流黃瓚玉。是享是宜。永綏多福。

送神用興安

皇考皇祖。配帝配天。駿奔顯相。神保言旋。祝以孝告。嘏以慈宣。去來永慕。宗事惟虔。

宗廟時享樂章

案宋史樂志曰。紹興以後時享。迎神用興安之曲。奉俎用豐安之曲。初獻盥洗用正安之曲。升殿用正安之曲。酌獻僖祖室用基命之舞。宣祖室用天元之舞。太祖室用皇武之舞。太宗室用大定之舞。

真宗室用熙文之舞。仁宗室用美成之舞。英宗室用治隆之舞。神宗室用大明之舞。哲宗室用重光之舞。徽宗室用承元之舞。欽宗室用端慶之舞。高宗室用大德之舞。孝宗室用大倫之舞。光宗室用大和之舞。文舞退武舞進用正安之曲。亞終獻用文安之曲。徹豆用恭安之曲。送神用興安之曲。凡二十五章。致堂胡氏曰。四時之祀。天子用四孟月。禮之正也。此時享之所由肇歟。

迎神用興安 四章

黃鐘爲宮

御製禮記正義 卷之三
奉先嚴祀。率禮大經。時思致享。肅薦芳馨。竭誠備物。樂
奏和聲。真馭來止。熙事克成。

大呂爲角

聖靈在天。九關崇深。風馬雲車。紛其顧臨。擁祥儲休。昭
答孝心。孝孫受祉。萬福是膺。

大太簇爲徵

嘉承和平。秩祀爲先。乃練休辰。祝史告虔。內心齊明。祀
具吉蠲。交際恍惚。如在後前。

應鐘爲羽

道信于神。神靈燕娛。酒有嘉德。物惟其時。緩節安歌。樂

奏具宜。欣欣樂康。福祿綏之。

奉俎用豐安

王假有廟。子孫保光。奉牲以告。玉俎膏香。專精厲意。神
其廸嘗。休承靈意。申錫無疆。

初獻盥洗用正安

恪恭祀典。涓選休成。設洗致潔。直于東榮。嘉觴祇薦。明
德惟馨。祖考來格。享茲孝誠。

升殿用正安

冠佩雍容。時惟上公。享于清廟。陟降彌恭。籩豆靜嘉。粢
盛潔豐。孝孫有慶。萬福來同。

酌獻僖祖室用基命

於穆文獻。自天發祥。肇基明命。錫羨無疆。子孫千億。宗社靈長。神之格思。如在洋洋。

宣祖室用天元

天啓炎歷。集我大命。長發其祥。篤生上聖。夷亂芟荒。乾坤已定。時祀聿修。孝孫有慶。

太祖室用皇武

赫赫藝祖。受天明命。威加八紘。德垂累聖。祀事孔明。有嚴笙磬。對越在天。延休錫慶。

太宗室用大定

明明在上。時惟太宗。允武允文。丕基紹隆。於肅清廟。昭報是豐。皇靈格思。福祿來同。

真宗室用熙文

於穆真皇。維烈有光。丕承二后。奄奠萬方。威加戎狄。道格穹蒼。歆時禋祀。降福無疆。

仁宗室用美成

至哉帝德。乃聖乃神。恭已南面。天下歸仁。歷年長久。垂裕後人。祀修舊典。寶命維新。

英宗室用治隆

炎基克鞏。赫赫英宗。紹修前烈。仁化彌隆。篤生聖子。堯

湯比蹤。烝嘗萬世。福祿來崇。

神宗室用大明

於昭神祖。運撫明昌。肇新百度。克配三王。遐荒底績。聖武維揚。永言執競。上帝是皇。

哲宗室用重光

於皇濬哲。適駿有聲。率時昭考。不顯儀型。功光大業。道協三靈。永綏厥後。來燕來寧。

徽宗室用承元

天錫神聖。徽柔懿恭。垂衣拱手。遵制揚功。配天立極。體道居中。佑我烈考。萬福攸同。

欽宗室用端慶

於皇欽宗。道備德宏。允恭允儉。克類克明。孝遵前列。仁翊函生。歆茲肆祀。永燕宗祚。

高宗室用大德

於皇時宋。自天保定。高宗受之。再僕景命。紹開中興。翼善傳聖。于千萬年。永綏厥慶。

孝宗室用大倫

聖人之德。無加于孝。思皇孝宗。履行立教。始終純誠。非曰笑貌。於萬斯年。是則是倣。

光宗室用大和

維宋治熙。帝繼于理。萬姓厚生。三辰順軌。對時天休。以燕翼子。肅唱和聲。神其有喜。

文舞退武舞進用正安

肅肅清廟。於顯惟德。我祀孔時。我奏有翼。秉翟載駿。有來干戚。神之燕娛。休祥允格。

亞終獻用文安

觀德宗祏。奕世烈光。有嚴祀典。粵循舊章。樂諧九變。獻舉重觴。燕娛如在。戩穀穰穰。

徹豆用恭安

禮備樂成。物稱誠竭。相維辟公。神人以說。歌雍一章。諸

宰斯徹。天子萬年。無競維烈。

送神用興安

霜露既降。時思展禋。在天之御。睠然顧歆。樂成禮備。言歸靡停。既安既樂。福祿來成。

宋至和禘享樂章

案宋史樂志曰。至和時禘享。迎神用興安之曲。奠瓚用嘉安之曲。送神用興安之曲。凡三章。餘如常享。古之禘祭。奉太祖與毀廟未毀廟之主而合祀之。其制則太祖東向。左昭右穆。以次爲位而祭之。但禘有時祭之禘。禘禘。禘嘗。禘烝是也。又有五年一禘。三年一

禘是也。時禘止於未毀廟之主。大禘則及毀廟之主。茲禘享樂章內。有云再周之期。殆大禘歟。

迎神用興安

濡露降霜。永懷孝思。禘食禘叙。再周之期。歌德詠功。八音播之。歆神惟始。靈其格茲。

奠瓚用嘉安

昭穆親祖。自室徂堂。禮備樂成。肅然裸將。瑟瓚黃流。條鬯芬芳。氣達淵泉。神孚來享。

送神用興安

四祖基慶。三后在天。薦侑備成。靈娛其旋。孝孫應嘏。受

福永年。送之懷之。明發惻然。

嘉祐禘享樂章

案宋史樂志曰。嘉祐時禘享。迎神用懷安之曲。送神曲名同。凡二章。

迎神用懷安

來茲孝享。禮備樂成。神登于俎。祝導于祊。展牲肥腍。奏格和平。靈其昭格。肅僎凝情。

送神用懷安

靈神歸止。光景肅然。福祥裕世。明威在天。孝孫有慶。駿烈推先。佑茲基緒。彌萬斯年。

熙寧以後裕享樂章

案宋史樂志曰。熙寧以後享廟。酌獻英宗室用大英之舞。送神用興安之曲。禘祫孟享臘享宗正卿升殿用正安之曲。裕享仁宗用大和之舞。英宗用大康之舞。凡五章。

酌獻英宗室用大英

在宗五世。天子嗣昌。躬發英斷。若乾之剛。聲容沄沄。被于八荒。垂千萬年。永烈有光。

送神用興安

鐘鼓惟旅。籩豆孔明。衍我祖宗。既右享之。神亟來止。孝

孫之喜。神保聿歸。孝孫之思。

禘祫孟享臘享宗正卿升殿用正安

進退有容。服章有儀。匪亟匪遲。降登孔時。

裕享仁宗用大和

於穆仁廟。聖澤滂流。華夷用義。動植蒙休。徽名冠古。奕世垂謀。帝躬裸獻。盛典昭修。

英宗用大康

赫赫英皇。總提邦紀。濬發神功。恢張聖理。仙馭雖遙。鴻徽不弭。永言孝思。竭誠躬祀。

又裕享樂章

案宋史樂志曰。禘享。迎神用興安之曲。酌獻順祖。用大寧之曲。翼祖用興安之曲。光宗用大承之曲。送神用興安之曲。凡八章。宋時禘祭。至和嘉祐。各有樂章。茲雖未載年月。殆建炎南渡以後更定者歟。

迎神用興安

黃鐘宮

時維孟冬。霜露既零。合食盛禮。以時以行。孝心翼翼。惟神來寧。肅倡斯舉。神具是聽。

大呂角

於穆孝思。嘉薦惟時。誠通茲格。咸來燕娛。神之聽之。申錫蕃釐。於萬斯年。永保丕基。

太簇徵

於昭孝治。通乎神明。寒暑不忒。熙事備成。牲牲孔碩。黍稷惟馨。以享以祀。來燕來寧。

應鐘羽

苾芬孝祀。薦灌肅雍。致力于神。明信咸通。靈之妥留。惠我隴鴻。廣被萬寓。福祿攸同。

初獻順祖酌獻用大寧

於赫皇祖。濬發其祥。德盛流遠。奕世彌昌。孝孫有慶。嘉

薦令芳。神保是享。錫羨無疆。

翼祖酌獻用興安

上天眷命。佑我不基。翼翼皇祖。不耀其輝。積厚流長。福祿攸宜。祀事孔時。曾孫篤之。

光宗酌獻用大承

於皇光宗。握符御極。昭哉嗣服。惟仁與德。勤施于民。靡有暇逸。萬年之思。永奠宗祏。

送神用興安

合祭大事。因時發天。翼翼孝思。三獻禮虔。神兮樂康。飈馭言旋。永福後人。於千萬年。

宋郊祀前朝享太廟樂章

案宋史樂志曰。高宗郊祀前。朝享太廟。皇帝入門。用乾安之曲。後還前殿。並同。皇帝升殿。用乾安之曲。詣室降殿。並同。盥洗用乾安之曲。迎神用興安之曲。尚書奉俎。用豐安之曲。皇帝再盥洗。用乾安之曲。酌獻僖祖室。用基命之舞。翼祖室。用大順之舞。宣祖室。用天元之舞。太祖室。用皇武之舞。太宗室。用大定之舞。真宗室。用熙文之舞。仁宗室。用美成之舞。英宗室。用治隆之舞。神宗室。用大明之舞。哲宗室。用重光之舞。徽宗室。用承光之舞。降殿。用乾安之曲。入小次。用乾

安之曲。文舞退武舞進用正安之曲。亞獻用正安之曲。終獻用正安之曲。出小次用乾安之曲。再升殿詣飲福位用乾安之曲。飲福用禧安之曲。還位用乾安之曲。尚書徹豆用豐安之曲。送神用興安之曲。降殿用乾安之曲。還大次用乾安之曲。凡三十章。祭義曰。惟聖人爲能饗帝。孝子爲能饗親。朝享之禮。是卽郊特牲受命于祖廟。作龜于禰宮。尊祖親考之義也。

皇帝入門用乾安

於皇我后。祇戒專精。假于有廟。祖考是承。趨進惟肅。僂思惟誠。神之聽之。來燕來寧。

天命皇帝升殿用乾安

皇皇大宮。丕顯於穆。休德昭清。元氣回復。芝葉蔓茂。桂華馮翼。孝孫假斯。受茲介福。

盥洗用乾安

維皇齊精。醴假于廟。觀盥之初。惟以潔告。衍承祖宗。恤祀昭孝。誠心有孚。介福斯報。

迎神用興安

柅鬯旣將。黃鐘具奏。肅我祖考。祇栗以俟。監觀于茲。雲車來下。

尚書奉俎用豐安

後

卷二十一

樂章考十二

三

有碩其牲。登于大房。肅展以享。庶幾迪嘗。匪膺是告。我民其康。保艾爾後。垂休無疆。

皇帝再盥洗用乾安

盥至于再。潔誠愈孚。帝用祇薦。靈咸嘉虞。騰歌臚歡。會于軒朱。觀厥顛若。受福之符。

酌獻僖祖室用基命

思文僖祖。基德之元。皇武大之。受命于天。積厚流光。不已其傳。曾孫篤之。於萬斯年。

翼祖室用大順

天命有開。維仁是依。迺睠冀邦。予以顧之。其顧伊何。發

祥肇基。施于孫子。虔奉孝思。

宣祖室用天元

昭哉皇祖。源深流長。雕戈圭瓚。休有烈光。天祐潛德。繼世其昌。永懷積累。嘉薦令芳。

太祖室用皇武

為民請命。皇祖赫臨。天地並貺。億萬同心。造邦以德。介福宜深。挹彼惟旨。真游居歆。

太宗室用大定

皇矣太宗。嗣服平成。益奮神旅。再征不庭。文武秉德。仁孝克明。以聖傳聖。對越紫清。

真宗室用熙文

思文真宗。體道之崇。愴威赫靈。遵制揚功。真符鼎來。告成登封。盛德百世。於昭無窮。

仁宗室用美成

徽宗御製

仁德如天。徧覆無偏。功濟九有。恩涵八埏。齊民受康。朝野晏然。擊壤歌謠。四十二年。

英宗室用治隆

穆穆英宗。持盈守成。世德作求。是纘是承。齊家睦族。偃武恢文。於薦清醕。酌之欣欣。

神宗室用大明

烝哉維后。繼明體神。稽古行道。文物一新。潤色鴻業。垂裕後人。靈旂沛然。來燕來寧。

哲宗室用重光

明哲煌煌。照臨無疆。紹述先志。實宣重光。詒謀燕翼。率由舊章。苾芬孝祀。降福穰穰。

徽宗室用承光

高宗御製

於皇烈考。道化聖神。堯聰舜孝。文恬武忻。命于出震。遺駿上賓。罔極之哀。有古莫倫。

降殿用乾安

明德惟馨。進止回復。禘襲安恭。嚴若惟谷。誠意昭融。羣

工袂屬。成此稜容。生乎齊肅。

入小次用乾安

於皇我后。祇戒專精。躬製聲詩。文思聰明。雍容戾止。玉立端誠。神聽如在。福祿來寧。

文舞退武舞進用正安

八音諧律。綴兆充庭。進旅退旅。肅恭和平。盛薦祖宗。靈監昭升。象功崇德。適觀厥成。

亞獻用正安

威神在天。享于克誠。申以貳觴。式昭德馨。籩豆孔嘉。樂舞具陳。庶幾是聽。福祿來成。

終獻用正安

疏羃三舉。誠意一純。孰陪予祀。公族振振。神具醉止。燕娛窈冥。於萬斯年。綏我思成。

皇帝出小次用乾安

夙戒告備。禮節俯成。妥侑惟乾。氛氲夜澄。有嚴有翼。列聖靈承。於穆清闕。肅肅無聲。

皇帝再升殿詣飲福位用乾安

維皇親享。至再至三。禮備樂奏。層陛森嚴。粢盛芳潔。酒醴旨甘。雲車風馬。從衛觀瞻。

飲福用禧安

赫赫明明。維祖維宗。鑒于文孫。惟德之同。日靖四方。亦同其功。億萬斯年。以承家邦。

還位用乾安

帝既臨享。步武鳴鸞。陟降規矩。顒卬周旋。登歌一再。典禮莫愆。神之聽之。祉福綿綿。

尚書徹豆用豐安

熙事既成。嘉籩告徹。洋洋來臨。藹藹布列。配帝其功。在天對越。允集叢釐。萬邦和悅。

送神用興安

神之來游。風馬雲車。淹留彷彿。顧瞻欷歔。神之還歸。鈞

天帝居。監觀于下。何福不除。

降殿用乾安

於皇上天。欽哉成命。集于冲人。丕承列聖。爰熙紫壇。于廟告慶。肸鬯潛通。休祥薦應。

還大次用乾安

盛德豐功。一祖六宗。欽翼燕詒。禋享是崇。厲意齊精。假廟惟恭。率禮周旋。福祿來同。

寧宗朝享樂章

案宋史樂志曰。寧宗朝享。皇帝入門用乾安之曲。升殿用乾安之曲。盥洗用乾安之曲。詣室用乾安

之曲。還位用乾安之曲。迎神用興安之曲。奉俎用
豐安之曲。再詣盥洗用乾安之曲。酌獻真宗室用
熙文之舞。仁宗室用美成之舞。英宗室用治隆之
舞。神宗室用大明之舞。哲宗室用重光之舞。徽宗
室用承光之舞。欽宗室用端慶之舞。高宗室用大
德之舞。孝宗室用大倫之舞。光宗室用大和之舞。
辭與時享同。還位用乾安之曲。降殿用乾安之曲。
入小次用乾安之曲。文舞退武舞進用正安之曲。
亞獻用正安之曲。終獻用正安之曲。出小次用乾
安之曲。再升殿用乾安之曲。飲福用乾安之曲。還
四章。

皇帝入門用乾安

王假有廟。四極駿奔。鼎俎宵嚴。虞龔雲屯。積厚流廣。德
隆慶蕃。是則是繩。保我子孫。

升殿用乾安

於穆清宮。奕奕孔碩。芝莖蔓秀。桂華馮翼。八簋登列。六
瑚賁室。皇代擁慶。啟佑千億。

盥洗用乾安

天一以清。地一以寧。維皇精專。承神明靈。娥御墮津。瀆祇揚溟。盟事允嚴。先祖是聽。

詣室用乾安

丹楹雲深。芬勺宵奠。樂華淳鬯。禮文炳絢。有容有儀。載肅載見。維時緝熙。世世以燕。

還位用乾安

旅楹有閑。人神允協。福以德昭。饗以誠接。六樂宣揚。白禮皤皤。對越在天。流祚萬葉。

迎神用興安 九變

黃鐘為宮

咸英備樂。簋席列聿。詩歌安世。聲叶皇雅。翼旗羽蓋。雲車風馬。神其來兮。以燕以下。

大呂為角

勾陳旦闕。闐闐夜分。軫風挾月。車駟凌雲。瑞景掩藹。神光耀煜。神其來兮。以留以忻。

太簇為徵

穆穆紫幄。璜璜清宮。早麓流詠。鳧鷖叶工。道閎詒燕。業綿垂鴻。神其來兮。以康以崇。

應鐘為羽

文以謨顯。武以烈承。聖訓之保。祖武之繩。有肅孝假。式

嚴衍烝神其來兮。以宜以寧。

奉俎用豐安

簋豆薦牲。鉶籩實饋。其俎孔庶。吉蠲為饗。惟德達馨。以忱以貴。神既佑享。祉貺來暨。

再詣盥洗用乾安

精粹象天。明清鑑月。再御茲盥。益致其潔。齊容顯若。誠意洞徹。百禮允洽。率禮不越。

酌獻真宗室用熙文

天地熙泰。躋時昇平。闡符建壇。聲容文明。君臣賡載。夷夏肅清。本支百世。持盈守成。

仁宗室用美成

在宋四世。天子聖神。用賢致治。約已裕民。海內富庶。裔夷肅賓。四十二年。堯舜之仁。

英宗室用治隆

明明英后。仁孝儉恭。丕顯丕承。增光祖宗。繼志述事。遵制揚功。萬邦作孚。盛德形容。

神宗室用大明

厲精基治。大哉乾剛。信賞必罰。內脩外攘。禮樂法理。號令文章。作新之功。度越百王。

哲宗室用重光

於皇我宋。世有哲明。元祐用人。通駿有聲。紹述先志。思監于成。受天之祐。王配于京。

徽宗室用承元

帝撫熙運。晏粲協期。禮明樂備。文恬武熙。道光授受。謀深燕詒。駿命不易。子孫保之。

欽宗室用端慶

顯顯令主。輝光日新。奉親以孝。綏下以仁。兢兢業業。誕保庶民。於穆不已。之德之純。

高宗室用大德

昊天有命。中興復古。治定功成。修文偃武。德隆商宗。業

闕漢祖。付託得人。系堯之緒。

孝宗室用大倫

藝祖有孫。聰睿神武。紹興受禪。歸尊于父。行道襲爵。百度脩舉。聖德曰孝。光于千古。

還位用乾安

在周之庭。設業設虞。酒醴惟醕。爾殽伊脯。帝觴畢勺。天步旋舉。丕顯丕承。念茲皇祖。

降殿用乾安

黼幄蟬蛸。飈旂寧燕。尊彝獻裸。瑚簋陳薦。眎儀天旋。淳音韶變。適求厥寧。福祿流羨。

入小次用乾安

皇容肅祇。天步舒遲。對越惟恭。敬事不違。陟降涖止。永言孝思。上帝臨汝。日監于茲。

文舞退武舞進用正安

明庭承神。鞀磬祝啟。玉梢飾歌。佾綴維旅。既肖厥文。復象乃武。祖德宗功。惟帝時舉。

亞獻用正安

尊斝星陳。壘幕雲舒。來貳鸞觴。玉佩瓊琚。相予嚴祀。秉德有初。對揚王休。何福不除。

終獻用正安

秉德翼翼。顯相肅雝。疏簪三舉。誠意益恭。光燭黼黻。和

流笙鏞。子孫衆多。福祿來從。

出小次用乾安

廟楹邃嚴。夜景藻清。文物炳彪。禮儀熙成。帷宮載敞。珮珩有聲。帝復對越。將受厥明。

再升殿用乾安

明明維后。詒厥孫謀。系隆我漢。陳錫哉周。以孝以饗。世德作求。介以繁祉。萬邦咸休。

飲福用乾安

玉瓚黃流。有飶其香。來格來享。降福穰穰。我應受之。湯

孫之將。有百斯男。福祿無疆。

還位用乾安

聖圖廣大。宗祊光輝。假于有廟。帝命不違。僂若有慕。夙夜畏威。嘉樂君子。福祿祁祁。

徹豆用豐安

升饌有章。卒食攸序。庭鏘金奏。凱收鉶筥。其獻惟成。其餽惟旅。禮洽慶流。皇祖之祐。

送神用興安

珠幄煇黃。神旣燕娛。監觀于下。福祿來宜。雲車風馬。神保聿歸。尚佑我後。福祿來爲。

降殿用乾安

聖有謨訓。詒謀燕翼。奉天酌祖。萬世維則。維皇孝熙。乾乾夕惕。禮旣式旋。惟福之錫。

還大次用乾安

王假有廟。對越在天。惟宮旋御。率禮不愆。泰時展祠。雲陽奉瑄。齊居精明。益用告虔。

理宗朝享樂章

案宋史樂志曰。理宗朝享。皇帝升降用乾安之曲。迎神用興安之曲。酌獻寧宗室用大安之曲。凡三章。前高宗寧宗。皆有釐定郊祀前朝享樂章。理宗

繼續。因增入寧宗室之曲也。

皇帝升降用乾安

於皇祖宗。清廟奕奕。威靈在天。不顯惟德。垂裕闕延。詒

謀燕翼。孝孫格斯。受祉罔極。

迎神用興安九奏

王知音案。拒鬯既將。三句。即用高宗朝。享迎神興安樂

辭。六則詳文

拒鬯既將。黃鐘具奏。瞻望真游。優若有慕。於皇列聖。在帝左右。雲車具來。以妥以侑。

酌獻寧宗室用大安

帝德之休。恭儉淵懿。三十一年。謹終如始。升祔在宮。祖功並美。民懷有仁。於千萬世。

帝廟

樂章

考十三

宗廟

宋二

御製律呂正義後編卷之一百五

樂章考十三

宗廟

宋二

御製律呂正義後編卷之一百五

御製律呂正義後編卷之一百五

樂章考十三

宗廟

宋二

宋祀明堂前朝享太廟樂章

案宋史樂志曰。高宗祀明堂前朝享太廟。皇帝入門用乾安之曲。升殿用乾安之曲。盥洗用乾安之曲。迎神用興安之曲。奉俎用豐安之曲。酌獻僖祖室用基命之舞。翼祖室用大順之舞。宣祖室用天元之舞。太祖室用皇武之舞。太宗室用大定之舞。真宗室用熙文之舞。仁宗室曲同郊祀。送神亦同。英宗室用治隆之舞。神宗室用大明之舞。哲宗室用重安之舞。徽宗室用承元之舞。文舞退武舞進用正安之曲。亞獻用正安之曲。終獻用正安之曲。飲福用僖安之曲。徹豆

用豐安之曲。還大次用乾安之曲。凡二十一章。通典曰。黃帝拜祀于明堂。明堂上古爲祭天之所。惟宗祀文王以配上帝。昉于周公。後世率由罔廢。但嚴父配天。諸廟未能遍及。故明堂前朝享。亦猶郊祀前之禮云。

案高宗以紹興元年始饗明堂。時初駐會稽。渡江舊樂復皆燬散。太常卿蘇遲等言。宜權用望祭禮例。止設登歌。用樂工四十七人。乃訪舊工以備其數。四年再饗。國子丞王普言。詞律不相諧協。乞復用古制。又郊祀版位在午階下。故還位。奏黃鐘。明堂版位在阼階。則還位當歌大呂。今並奏黃鐘。於義未當。尋皆如普議。據此第言饗明堂不及朝享。則明堂前朝享樂章。其創于紹興二年以後歟。

皇帝人門用乾安

於皇我后。祇戒專精。齊肅有容。祖考是承。造次匪懈。孝思純誠。神聽有格。福祿來寧。

升殿用乾安

肅哉清宮。煥珠照幄。神之來思。八音振作。赤鳥龍章。奉玉惟恪。匪今斯今。先民時若。

盥洗用乾安

於皇維后。觀盥之初。精意昭著。既順既愉。圭鬯承祀。卿士咸趨。目視心化。四方其孚。

迎神用興安

涓選休成。祖考是享。夙夜專精。求諸惚恍。洋洋在上。惟神之仰。鬯矣清明。應之如響。

奉俎用豐安

來相於庭。鳴鏞鏘鏘。奉牲而告。登彼雕房。非牲之備。民庶是康。神依民聽。上帝斯皇。

酌獻僖祖室用基命

何慶之長。實兆于商。由商太戊。子孫其昌。皇基成命。宋

道用光。詒厥孫謀。膺受四方。

翼祖室酌獻用大順

上帝監觀。維仁是依。繼世脩德。皇心顧之。其顧伊何。在彼翼方。施于子孫。降福穰穰。

宣祖室酌獻用天元

昭哉皇祖。駿發其祥。雕戈圭瓚。威烈載揚。天錫寶符。俾熾而昌。神聖應期。赫然垂光。

太祖室酌獻用皇武

猗歟皇祖。下民攸歸。膺帝之命。龍翔太微。戎車雷動。天地清夷。峩峩奉璋。萬世無違。

大宗室酌獻用大定

煌煌神武。再御戎軒。時惠南土。旅定太原。車書混同。聲教布宣。維天佑之。億萬斯年。

真宗室酌獻用熙文

於皇真宗。體道之崇。游心物外。應跡寰中。四方既同。化民以躬。清淨無爲。盛德之容。

英宗室酌獻用治隆

噫我大君。嗣世脩文。維文維武。謏繼虞勳。天錫丕祚。施于後昆。於薦清醑。酌之欣欣。

神宗室酌獻用大明

烝哉維后。繼明體神。憲章文武。宜民宜人。經世之道。功格于天。子孫嚴祀。無窮之傳。

哲宗室酌獻用重安

明哲煌煌。照臨無疆。丕承先志。嘉靖多方。朝廷尊榮。民庶樂康。珍符來應。錫茲重光。

徽宗室酌獻用承元

聖孝巍巍。光照丕基。禮隆樂備。時惟純熙。天仁兼履。皇化無爲。功成弗處。心潛希夷。

文舞退武舞進用正安

作樂合祖。篲簋在庭。衆奏具舉。肅雝和鳴。神靈來格。庶

御製律呂正統編 卷之三
五
幾是聽。噉繹以終。永觀厥成。

亞獻用正安

威神在天。來格于誠。既載清酤。有聞無聲。相予熙事。時
賴宗英。肅肅雍雍。允協思成。

終獻用正安

疏冪三舉。誠意一純。孰陪予祀。公侯振振。明靈來娛。樂
舞具陳。奉神所佑。昭孝息民。

飲福用禧安

赫赫明明。德與天通。施于子孫。福祿攸同。日靖四方。民
和年豐。有秩斯祐。申錫無窮。

徹豆用豐安

歆我齊明。威德如存。牲牲是享。圭玉其溫。羣公執事。亦
既駿奔。禮成告徹。咸福黎元。

還大次用乾安

神明既交。恍若有承。欽翼齊莊。福祿具膺。王業是興。祖
武是繩。佑我億年。以莫不增。

孝宗明堂前享太廟樂章

案宋史樂志曰。孝宗祀明堂前朝享太廟。徽宗室
酌獻用承元之舞。高宗室酌獻用大德之舞。與前
時享辭同。還大次用乾安之曲。凡二章。

徽宗室酌獻用承元

明明徽祖。撫世升平。制禮作樂。發政施仁。聖靈在天。德澤在民。億萬斯年。保佑後人。

還大次用乾安

禮既行矣。樂既成矣。維祖維妣。安且寧矣。皇舉玉趾。佩將鳴矣。拜貺總章。于厥明矣。

理宗明堂前享太廟樂章

案宋史樂志曰。理宗明堂前朝享太廟。寧宗室奠幣用定安之曲。酌獻用考安之曲。凡二章。

寧宗室奠幣用定安

皇矣昭考。聖靈在天。稱秩宗祀。有嚴恭先。奉幣以薦。見之僂然。仁深澤厚。厥光以延。

酌獻用考安

假哉皇考。必世後仁。嘉靖我邦。與物皆春。之純之德。克配穹旻。餘慶淵如。佑我後人。

宋上徽號樂章

案宋史樂志曰。上仁宗英宗徽號。入門升殿用顯安之曲。凡一章。禮記曰。先王謚以尊名。節以壹惠。耻名之浮其實也。王者則稱天以誅之。讀誅定謚。謚法卽爲廟號。乃又有徽號者。蓋一字未足盡其美。因累數

字或數十字以美之。雖非古式。然劉勰文心雕龍曰。殷臣誅湯。追褒元鳥之祥。周史歌文。上闡后稷之烈。誄述祖宗。詩人之則也。

入門升殿用顯安

於穆仁祖。寵綏萬方。執競英考。迄用成康。圖徽寶冊。有烈其光。庶幾億載。與天無疆。

上英宗尊號樂章

案宋史樂志曰。上英宗尊號。入門用正安之曲。凡一章。

入門用正安

在宋五世。天子神明。羣公奉冊。迺揚鴻名。金書煌煌。適昭厥成。思皇多祐。與天同聲。

上神宗徽號樂章

案宋史樂志曰。上神宗徽號。升殿用顯安之曲。凡一章。哲宗朝製。

升殿用顯安

於惟禰廟。乃聖乃神。秉文之士。作起維新。建宮稽古。一視同仁。庶幾備號。以享天人。

上徽宗徽號樂章

案宋史樂志曰。紹興十四年。奉上徽宗冊寶。冊寶

入門用顯安之曲。冊寶升殿。上徽號。曲名同。凡三章。

冊寶入門用顯安

於鑠徽考。如天莫名。迨茲丕揚。擬純粹精。溫玉鏤文。來至于旂。有嚴奕奕。禮備樂成。

冊寶升殿用顯安

金字煌煌。瑤光燦燦。羣工奉之。登此寶殿。對越祖宗。式遵成憲。威靈在天。來止來燕。

上徽號用顯安

惟精惟一。乃聖乃神。鴻名克揚。茂實斯賓。如禹之功。如

堯之仁。孝思永慕。用詔無垠。

上高宗徽號樂章

案宋史樂志曰。淳熙十五年。上高宗徽號。冊寶入門用顯安之曲。冊寶升殿。上徽號。曲名同。凡三章。

冊寶入門用顯安

於穆高皇。功德兼隆。稱天以誅。初諡未崇。載稽禮典。揚徽垂鴻。涓日之良。登進廟宮。

冊寶升殿用顯安

有瑑斯寶。有編斯冊。導以麾仗。奏以金石。禋威盛容。煌煌赫赫。臣工奉之。高靈來格。

上徽號用顯安

中興之烈。高掩商宗。揖遜之美。放勳比隆。字十有六。擬諸形容。威靈在天。裕後無窮。

上孝宗徽號樂章

案宋史樂志曰。慶元三年。奉上孝宗徽號。冊寶入門。用顯安之曲。冊寶升殿。上徽號。曲名同。凡三章。冊寶入門。用顯安。

巍巍孝廟。聖德天通。同符藝祖。克紹高宗。有儀有冊。載推載崇。鏤玉繩金。登奉祏宮。

冊寶升殿用顯安

文金晶熒。冊玉輝潤。統紹乎堯。德全乎舜。勤崇推高。子孝孫順。冠德百王。萬年垂訓。

上徽號用顯安

金石充庭。珩璜在列。繪畫乾坤。形容日月。巍巍功德。顯顯謨烈。垂億萬年。鴻徽昭揭。

宋告饗樂章

案宋史樂志曰。真宗時。告受天書。用瑞安之曲。太祖太宗加上尊諡。用顯安之曲。東封畢躬謝酌獻。用封安之曲。祀汾陰畢躬謝酌獻。用顯安之曲。聖祖降親告。用瑞安之曲。六室加諡。用顯安之曲。凡六章。書告。

饗。非常祭也。

告受天書用瑞安

寶命自天。鴻禧錫祚。昭晰綠文。氤氳黃素。元感薦彰。靈
休誕布。寅奉珍符。聿懷永慕。

太祖太宗加上尊謚用顯安

報貺陟封。聿昭典禮。讓德穹厚。歸功祖禰。丕顯尊稱。盡
善盡美。寅威孝思。以介蕃祉。

東封畢躬謝酌獻用封安

奕奕清廟。錫美詒謀。升中神嶽。顯允皇猷。歸格藝祖。昭
報靈休。奉先追遠。盛德益修。

祀汾陰畢躬謝酌獻用顯安

於昭列祖。休德清明。威靈如在。享于克誠。報功厚載。馨
薦惟精。歸格飲至。禮備樂成。

聖祖降親告用瑞安

於赫聖祖。景靈在天。神遊來暨。睟容穆然。誨言昭示。帝
胄開先。齊明欽若。延鴻億年。

六室加謚用顯安

欽崇太霄。肅奉徽冊。大禮克誠。鴻猷有赫。令芳爰薦。明
靈斯格。昭謝垂祥。永懷何極。

汾陰禮畢告饗樂章

案宋史樂志曰真宗汾陰禮畢親謝元德皇后室迎神用肅安之曲奉俎用豐安之曲送神用理安之曲凡三章。

迎神用肅安

案闕宮奕奕四句即用皇后廟肅安曲辭但將雅字易韶字牲器肅設易為牲幣虔列几筵用張用字易一肅字耳。

闕宮奕奕韶樂洋洋牲幣虔布几筵肅張醴泉淳美嘉肴潔香俟神來格降彼帝鄉。

奉俎用豐安

樂鏗金石俎奉犧牲九成斯奏五教爰行。

送神用理安

鸞駟復整鶴馭難留白雲縹緲紫府深幽廟雖載止神無不遊垂祐皇宋以永鴻休。

宋升祔樂章

案宋史樂志曰元德皇后升祔用顯安之曲凡一章。

顯安

顯矣皇妣德侔柔祇升祔太室協禮之宜耀彼寶冊列之尊彝惟誠是厚永佑慶基。

崇恩太后升祔樂章

案宋史樂志曰。崇恩太后升祔。入門用顯安之曲。神主升殿用顯安之曲。迎神用興安之曲。罍洗用嘉安之曲。升降殿用熙安之曲。酌獻用茲安之曲。亞獻用神安之曲。退文舞進武舞用昭安之曲。終獻用儀安之曲。徹豆用成安之曲。送神用興安之曲。凡十四章。

入門用顯安

視天生德。作配元符。儀刑壺則。輔佐帝圖。登崇廟祏。勅號璠璣。烝嘗億載。皇極之符。

神主升殿用顯安

日嬪下京。天作之配。進賢審官。克勤其志。於穆清廟。本仁祖義。億萬斯年。神靈攸暨。

迎神用興安 四章

黃鐘宮二奏

闕宮有恤。堂筵屹崇。靈徽匪遐。精誠感通。苾芬惟時。登茲明祀。冷然靈車。有來其馭。

大呂角二奏

羽旌風翔。翠蕤飄舉。儼其音徽。登茲位處。笙鏞始奏。合止祝啟。是享是宜。永求伊祐。

太簇徵二奏

枚枚闕宮。鼎鼎肆陳。烝昇明靈。登其嘉新。鼓鐘既戒。旨酒斯醇。攸介攸止。純禧薦臻。

應鐘羽二奏

旨酒嘉肴。于登于豆。是享是宜。樂既合奏。衍我懿德。執事溫恭。靈兮允格。有翼其從。

鬯洗用嘉安

列爵陳俎。芬芳和羹。撻金擊石。洋洋和聲。禮行伊始。我德惟明。既盥而往。於昭斯誠。

升降殿用熙安

笙簫紛如。陟彼廟庭。鏘鏘佩玉。懷茲先靈。神保聿止。音

容杳冥。繁福是介。萬年惟寧。

酌獻用茲安

雝雝玉佩。清酤惟良。粢盛具列。有飶其香。懷其徽範。德合無疆。于茲燕止。降福穰穰。

亞獻用神安

嬪于潛邸。爰正坤儀。闕睢光被。思齊名垂。柔德益茂。家邦以熙。皇心建崇。永羞牲粢。

退文舞進武舞用昭安

翩然干戚。揚庭陳階。文以經緯。武以威懷。其張其弛。節以音諧。迄茲獻享。妥靈綏來。

終獻用儀安

珩璜之貴。禕褕之尊。天作之合。內治慈恩。元良鍾慶。祉福乾坤。以享以祀。事亡如存。

徹豆用成安

鏘洋純繹。於論鼓鐘。周旋陟降。齊莊肅容。維壘既旨。維籩伊豐。歌雍以徹。介福來崇。

送神用興安

黍稷維馨。虞業充庭。既欽既戒。靈心是承。顧予烝嘗。言從之邁。申錫無疆。是用大介。

顯仁皇后祔廟樂章

案宋史樂志曰。紹興二十九年。顯仁皇后祔廟。酌獻用歆安之曲。凡一章。

酌獻用歆安

恭惟聖母。躋祔孔時。陳羞宗祏。徼福坤儀。鐘鼓惟序。牲玉載祗。於皇來格。永介丕基。

成肅皇后祔廟樂章

案宋史樂志曰。開禧三年。成肅皇后祔廟。酌獻用歆安之曲。凡一章。

酌獻用歆安

天合重華。內治昭融。承承繼繼。保佑恩隆。歸從阜陵。登

耐太宮。燕我後人。福祿來崇。

宋皇后廟上冊寶樂章

案宋史樂志曰。皇后廟上冊寶。入門用隆安之曲。冊寶升殿用崇安之曲。迎神用歆安之曲。壘洗用嘉安之曲。升降用熙安之曲。酌獻用明安之曲。退文舞進武舞用昭安之曲。亞終獻用和安之曲。徹豆用成安之曲。送神用歆安之曲。凡十三章。

冊寶入門用隆安

威儀皇止。庶尹在庭。爰舉徽章。遙觀厥成。勒宗揚休。寫之瓊瑛。迄于萬祀。發聞惟馨。

冊寶升殿用崇安

有猶有言。順承天則。聿崇號名。再揚典策。朱英寶函。左右翼翼。千秋萬歲。保茲無極。

迎神用興安 四章

黃鐘宮

籩豆大房。犧尊將將。馨香既登。明靈迪嘗。其樂伊何。吹笙鼓簧。靈來燕娛。降福無疆。

大呂角二奏

吉蠲惟時。禮儀既備。奉璋峩峩。羣公在位。神之格思。永錫爾類。展彼令德。于焉來暨。

太族徵二奏。雍雍在宮。翼翼在庭。顯相休嘉。肅雝和鳴。神嗜飲食。明德惟馨。綏我思成。式燕以寧。

應鐘羽二奏

犧牲既成。籩豆有楚。撝金擊石。式歌且舞。追懷懿德。令聞令儀。靈兮來格。是享是宜。

壘洗用嘉安

嘉肴旨酒。潔粢豐盛。既盥而往。以我齊明。有孚顒若。黍稷非馨。神之格思。享于克誠。

升降用熙安

佩玉鏘鏘。其來雝雝。陟降孔時。步武有容。恪茲祀事。神罔時恫。綏我邦家。福祿來崇。

酌獻用明安

旨酒嘉栗。有飶其香。衍我淑靈。歆此令芳。德貽彤管。號正椒房。神具醉止。降福穰穰。

退文舞進武舞用昭安

籥翟既陳。干戚斯揚。進旅退旅。一弛一張。其儀不忒。容服有光。以宴以樂。德音不忘。

亞終獻用和安

望高六宮。位應四星。輔佐君子。警戒相成。禕衣福崇。琛

冊追榮。于以奠之。有椒其馨。

徹豆用成安

濯濯其英。殖殖其庭。有來羣工。賚我思成。嘉肴既將。旨酒既清。雍徹不遲。福祿來寧。

送神用歆安

禮儀既備。神保聿歸。洋洋在上。不可度思。神之來兮。肸鬻之隨。神之去兮。休嘉是貽。

欽成皇后上冊寶樂章

案宋史樂志曰。上欽成皇后冊寶。入門升殿用顯安之曲。迎神用歆安之曲。盥洗用嘉安之曲。升降

用熙安之曲。酌獻用明安之曲。亞終獻用和安之曲。凡六章。

入門升殿用顯安

上帝錫美。實生婉淑。輔佐神皇。寵膺天祿。誕育泰陵。劬勞顧復。於昭徽音。久而彌郁。

迎神用歆安

於顯惟德。徽柔懿明。嬪于初載。有聞惟聲。肆我鼓鐘。萬舞在庭。神保是格。來止來寧。

盥洗用嘉安

有煒柔儀。率履不越。惠于初終。既明且達。我將我享。相

盥乃登。胡臭亶時。攸介攸寧。

升降用熙安

苾苾其芳。穀核惟旅。陟降孔時。有秩斯所。雍容內化。惟神之明。明不可渝。綏我思成。

酌獻用明安

天惟獻思。有相于內。右賢去邪。夙夜儆戒。猗歟追冊。重翟禕衣。既右享之。百世是儀。

亞終獻用和安

酌彼玉瓚。有椒其馨。醴假無言。雍容在庭。生莫與崇。於赫厥聲。祀事孔明。神格是聽。

明達皇后上冊寶樂章

案宋史樂志曰。上明達皇后冊寶。迎神用歌安之曲。酌獻用明安之曲。退文舞進武舞用昭安之曲。徹豆用成安之曲。送神用歆安之曲。凡五章。

迎神用歌安

恭儉宜家。柔順承天。德昭彤管。憂在進賢。寶而禕翟。追榮壽原。四時裸享。於萬斯年。

酌獻用明安

涓宮有嚴。廣樂在庭。鐘鼓筦磬。九變既成。縮茅以獻。潔秬惟馨。靈遊可想。來燕來寧。

退文舞進武舞用昭安

秉翟竣事。萬舞挺金。總干揮戚。節以鼓音。禮容有煒。肸
蠁來歆。淑靈是聽。雅奏愔愔。

徹豆用成安

登獻罔愆。俎豆斯徹。神具醉止。禮終樂闋。御事既退。姍
姍佩玦。介我繁祉。歆此蠲潔。

送神用歆安

備成熙事。虛除翠楹。神保聿歸。雲車夙征。鑿我休德。神
交惚恍。留祉降祥。千秋是享。

宋皇后廟樂章

案宋史樂志曰。皇后廟迎神用肅安之曲。太尉行用
舒安之曲。司徒奉俎用豐安之曲。酌獻孝明皇后室
用惠安之曲。孝惠皇后室用奉安之曲。孝章皇后室
用懿安之曲。懿德皇后室用順安之曲。淑德皇后室
用嘉安之曲。莊穆皇后室用理安之曲。莊懷皇后室
用永安之曲。元德皇后室用興安之曲。飲福用禧安
之曲。亞獻用恭安之曲。終獻用順安之曲。送神用歸
安之曲。凡十五章。周禮云。奏夷則。歌中呂。以享先妣。
先妣者。姜嫄也。姜是帝嚳之妃。后稷之母。故特立廟。
名曰闕宮。又禮論曰。晉伏采之議云。晉簡文鄭宣后。

既不配合。乃築宮于外。歲時就廟享祭。唐肅明后。因昭成皇后已配食。乃別立廟。今云皇后廟者。得母類是歟。

迎神用肅安

闕宮翼翼。雅樂洋洋。牲器肅設。几筵用張。飾以明備。秩其令芳。神兮來格。風動雲翔。

太尉行用舒安

服章觀象。山龍是則。容止踟踟。威儀翼翼。司徒奉俎。用豐安。

恪恭奉祀。祇薦犧牲。九成爰奏。有俎斯盈。

酌獻孝明皇后室用惠安

祀事孔明。廟室惟肅。鉶登籩豆。金石絲竹。既盈既薦。允恭允穆。奉神如在。以介景福。

孝惠皇后室用奉安

初陽作配。內助惟賢。柔順中積。英徵外宣。神宮有恤。明祀惟虔。歆誠降佑。於萬斯年。

孝章皇后室用懿安

猗那淑聖。象應資生。配天作合。與日齊明。椒宮垂範。彤史揚名。聿修茲祀。永奉粢盛。

懿德皇后室用順安

主門秉慶。帝族惟賢。功存內治。德協靜專。流芳圖史。垂
範紘緼。新廟有恤。祀禮昭然。

淑德皇后室用嘉安

明明英媛。德備椒庭。籩豆有踐。黍稷匪馨。靜嘉致薦。容
與昭靈。精意以達。顧享來寧。

莊穆皇后室用理安

曾孫襲慶。柔祇育德。正位居體。其儀不忒。教被宮壺。化
行邦國。祝史正辭。垂裕無極。

莊懷皇后室用永安

淑德昭著。至樂和平。登豆在列。膺香薦誠。六變合禮。八

音諧聲。穰穰景福。佑我休明。

元德皇后室用興安

為太宗后。為天下母。誕聖繼明。膺乾作主。玉振金相。蘭
芬桂芳。於萬斯年。永奉烝嘗。

飲福用禧安

葵尊鬯酒。慶佑遂行。介以純嘏。允答明誠。

亞獻用恭安

宗臣率禮。步玉鏘鏘。吉蠲斯獻。百祿是將。

終獻用順安

薦獻可終。禮容斯穆。以奉嘉觴。以膺多福。

送神用歸安

明禋告畢。靈輅難留。升雲杳邈。整馭優游。誠深嘉栗。禮罄欽修。豐融垂佑。佑以洪休。

景佑以後皇太后廟樂章

案宋史樂志曰。景佑以後。皇太后廟樂章。章獻明肅皇太后室。奠瓚用達安之曲。酌獻用厚安之曲。章懿皇太后室。奠瓚用報安之曲。酌獻用衍安之曲。章惠皇太后室。奠瓚用翕安之曲。酌獻用昌安之曲。凡六章。

章獻明肅皇太后室奠瓚用達安

肅肅闕宮。順時薦事。鬱鬯馨香。如見于仁。

酌獻用厚安

祥標會麓。德合方儀。萬邦展養。九御家慈。孝恭祐祐。美播聲詩。淑靈顧享。申錫維祺。

章懿皇太后室奠瓚用報安

青金玉瓚。裸將于京。永懷罔極。夙夜齊明。

酌獻用衍安

翊佐先朝。章明壺教。淑順謙勤。徽音在劭。樹風不止。劬勞匪報。黍稷令芳。嘏茲乃告。

章惠皇太后室奠瓚用翕安

裸圭既陳。酌鬯斯醇。音容彷彿。奠獻惟寅。

酌獻用昌安

內輔宣猷。夙昭壺則。保佑之勞。慈惠其德。榮養有終。芳風無極。享獻闕宮。載懷凄惻。

紹興別廟樂章

案宋史樂志曰。紹興別廟樂章。升殿用崇安之曲。奉俎用肅安之曲。懿節皇后室酌獻用明安之曲。亞終獻用嘉安之曲。徹豆用寧安之曲。凡五章。曲臺禮云。別廟皇后。禘祫于太廟。祔于祖姑之下。乃皇后先崩。故創別廟。非陳五節所謂宗廟父昭子

穆皆有配座。每室一帝一后之主也。

升殿用崇安

新廟肅肅。歲事以時。陟降階城。雍容有儀。鞠躬周旋。罔敢不祗。祝史正辭。靈其格思。

奉俎用肅安

肇闡廟祀。爰圖遺芳。物必稱德。或陳或將。有縟其儀。有苾其香。靈兮來下。割烹是嘗。

懿節皇后室酌獻用明安

會沙表慶。正位椒庭。徽音杳邈。宮壺儀刑。虔修祀事。清酌惟馨。縮以包茅。昭格明靈。

亞終獻用嘉安

霄漢月墮。郊原露稀。徽音如在。延佇來歸。有酒既清。累觴載祇。神具醉止。燕衍怡怡。

徹豆用寧安

仙馭弗返。眇邈清都。薦此嘉肴。既豐既腴。奠享有成。鼓樂愉愉。徹我豆籩。率禮無踰。

乾道別廟樂章

案宋史樂志曰。乾道別廟。詣廟用乾安之曲。升殿用乾安之曲。懿節皇后室酌獻用歆安之曲。凡三章。

詣廟用乾安

涓選休展。于秋之杪。既齊既戒。爰假祖廟。有血儀坤。舊章是倣。享祀奚爲。天子純孝。

升殿用乾安

宗祀九筵。先薦闕宮。陟自東階。煌煌袞龍。於穆聖善。監茲禮容。是享是宜。介福無窮。

懿節皇后室酌獻用歆安

丕顯文母。厚德維坤。仙馭雖邈。徽音固存。瑟彼玉瓚。酌此鬱尊。簡簡穰穰。裕我後昆。

紹興別廟樂章

案宋史樂志曰。紹興別廟。安穆皇后室酌獻用歆安之曲。安恭皇后室酌獻用歆安之曲。凡二章。

安穆皇后室酌獻用歆安

祥發俛天符。彰夢日。有懷茲容。孝享廟室。奉尊是酌。旨酒嘉栗。靈其格思。祚以元吉。

安恭皇后室酌獻用歆安

美詠河洲。德嬪滂泆。徽音如存。肇修已事。縮以包茅。酌以醴齊。靈來顧歆。降福攸備。

